

082.1  
G21  
G

53



国立国会図書館 タイトル『藝海珠塵』 請求記号 082.1-G21G

ガラス使用





藝海珠塵

史部記載類

南滙 吳 省蘭 泉之輯

錢塘 陳 文述 雲伯校

皇朝武功紀盛

趙翼纂 翼字雲崧號甌北江蘇陽湖人由中書

登乾隆辛巳恩科進士第三人授編修歷貴州貴西道有該餘叢考十家詩話

自序

欽惟我 國家武功之盛度越千古然勒勳紀績藏在

冊府天下無由盡知如薩爾濟山之戰

太祖高皇帝以數千人破明兵二十萬於五日之間此

皇朝武功紀盛序

56883





事爲亘古未有至今百八十餘年學士大夫已罕有能  
頌述者我

皇上御筆書事刻入

御製文集中宣示天下而後共知

神功聖烈之巍巍卽漢光武之戰昆陽金太祖之戰護  
步塔岡舉不足道也迨定鼎中原後

聖祖仁皇帝平三逆所以安內平朔漠所以攘外億萬  
年久安長治之業實定於此亦以歷年久遠莫能得其  
詳至我

皇上平準夷回部拓地幾二萬里掃北漠而中原之尤

非漢戍已校尉唐四鎮北庭所可同日語兩金川地雖  
小而山險路阻攻討倍苦功績亦倍奇以及臺灣之役  
度兵於重溟之外不逾時而奏凱此固皆近事在人耳  
目間然僅從邸報中略識始事終事之大概而於搃討  
亂逆之

聖心決機制勝之

睿略均未能縷悉也幸

皇上頒發四庫全書於江浙之文滙文宗文瀾三閣內  
有前數件方略共四百六十四卷備載用兵始末俾留  
心掌故之士皆得叩閣而伏讀之仰見



聖主表揚

先烈訓勵詰戎垂示無極至意第卷帙繁多詣閣來者一時難於遍閱臣幸與文滙裝訂之役敬謹尋繹於

聖祖之平三逆平朔漠既得推究原委而我

皇上平準夷回部時臣正直軍機繕寫 諭旨鈔錄奏

摺一切皆得與知其後從征緬甸又身在行間已而將

軍臣温福阿桂自滇赴蜀討兩金川道經臣貴西官舍

論兵事夜分乃別黔蜀接壤軍中聲息旦夕得聞臺灣

之役臣又為督臣李侍堯延入幕府首尾一年餘始終

其事故於此數次用兵見聞較切征緬時曾即軍中粗

有記述餘未及隨事載筆也歸田後擬一一追敘而閱

時已久年月件繫記憶不無稍誤今得方略以證前事

益覺歷歷如繪用不揣冒昧節繁撮要各為述略一篇

總名曰

皇朝武功紀盛使觀者易於披覽即不能詣閣讀四庫

書者亦皆曉然於我 朝功烈之隆焉夫鋪張鴻庥揚

厲偉績臣子職也臣舊史官也推

皇上宣示天下之意而演述之庶不蹈僭妄之罪所愧

文筆卑陋無以發揚萬一實不勝愧汗云乾隆五十七





藝海珠塵 三  
年壬子二月原任貴州貴西道前翰林院編修內閣中  
書軍機處行走 臣趙翼謹識

平定三逆述略一

國朝定鼎中原將三十年因三逆之叛又用兵十年而  
後天下大定三逆者吳三桂耿精忠尚之信也  
太宗文皇帝時明登州參將耿仲明隨副將孔有德航  
海來歸已而廣鹿島副將尚可喜亦降二人與有德皆  
遼人仲明則精忠祖可喜則之信父也時仲明封懷順  
王與恭順王有德同封可喜亦封智順王三桂山海衛  
人明末爲總兵官鎮山海關聞京師陷乞兵於我朝

適睿親王多爾袞兵至翁後遂降於軍前封平西王三  
人與有德皆隨大兵入關三桂西追流賊入蜀順治六  
年進封可喜平南王仲明靖南王使定廣東各率其部  
兵以行仲明道卒子繼茂襲與可喜同定廣東遂鎮其  
地後移駐福建繼茂卒精忠襲爵時定南王有德先戰  
死於粵西故平西平南靖南世稱三藩三藩中三桂功  
最多隨大兵定蜀定滇取永明王於緬甸平水西安氏  
皆與有勞故恩禮獨隆進封親王令統所部留鎮滇黔  
所屬文武官聽自選用又擢其部將王輔臣爲陝西提  
督李本深爲貴州提督吳之茂爲四川總兵馬寶爲雲



南總兵三桂鎮滇久僭擬踰制漸蓄異志日驕蹇精忠亦驚黠不法大爲閩人害惟可喜素恭順能恪守藩服聖祖仁皇帝以三桂可喜宣力有年年皆老且三藩分布半天下將成唐室方鎮之勢非久安計欲令釋兵還朝以全終始銷亂萌適可喜疏請乞骸骨率所部歸遼東乃特允其請此康熙十二年三月也三桂精忠不得已亦以是年七月疏請撤兵而實無行意三桂陰勒士馬禁遏郵傳并約結部將之在他省者精忠亦與相應和皆屢遷行期朝議分遣哲勒官陳一炳梁清標赴諸藩與籌撤兵後事宜且趣之行於是十一月二十一

日三桂遂發兵反殺巡撫朱國治自稱天下都招討兵馬大元帥以明年爲周元年僞號昭武李本深首應之雲貴總督甘文焜在貴陽聞變疾馳至鎮遠爲賊兵所圍自刎死有郎中黨務禮等在黔督辦三桂入京夫船疾馳至京上變湖廣總督蔡毓榮亦奏至詔削三桂官爵命順承郡王勒爾錦爲寧南靖寇大將軍貝勒察尼副之率師往荊州進討又以滇蜀接壤令西安將軍瓦爾喀赴蜀刑部尚書莫洛經略陝西軍事粵西地近貴州則以有德塔孫延齡爲將軍鎮之又命前鋒統領碩岱先進據常德以遏賊鋒兵未至而賊已逼清浪以



小除夕陷沅州總兵崔世祿被執巡撫盧震棄長沙奔岳州十三年正月賊至常德原任提督楊遇明寓居城中爲內應常德亦陷提督桑格援兵至不得入退還澧州澧州已應賊長沙副將黃正卿參將陳武衡又以長沙降賊四川巡撫羅森提督鄭蛟麟總兵譚洪吳之茂亦叛全蜀皆失二月孫廷齡又反於廣西殺都統王永年執巡撫馬雄鎮據有桂林平樂三月賊兵至岳州參將李國棟應之岳州亦陷耿精忠亦以是月反給執總督范承謨幽之民舍巡撫劉秉政降之是時三桂蓄力已久天下皆震其威聲白首舉事親至常澧督戰兵鋒

甚銳是以四方響應雲南貴州四川湖南廣西福建相繼失人心皆動搖幸 廟謨鎮定先事布置旣命勒爾錦等赴荆瓦爾喀等赴蜀而武昌南昌河南安慶江寧諸處先後遣重兵鎮守又駐兵於兗州太原以備應援楚警則調安慶兵援楚而兗州兵移安慶又調兵駐兗州以繼之蜀警則調西安兵援蜀而太原兵移西安又調兵駐太原以繼之遇有徵發絡繹奔赴不淹旬月故叛亂相尋終獲戡定皆用此法也而京師先有楊起隆之變起隆者市井無賴僞稱朱三太子布其黨李株等糾約滿洲各官家奴期以十三年元旦入朝時各殺其



主帥以主之官官之鑲黃旗監生郎廷樞家奴夜醉漏  
言廷樞聞之急上變遂捕得株等二百餘人誅之王大  
臣并奏誅三桂子孫之官於京師者乃戮其子應熊及  
孫世霖以淨根葉起隆尋亦捕得伏誅京師訛言始息  
未幾察哈爾又蠢動時方調邊外各蒙古兵察哈爾右  
翼王于布爾尼謀拒命他部多視爲向背

上聞之立命大學士圖海率滿洲兵三千疾馳往及其  
未發殲之於是諸蒙古帖復無後顧憂得專力南征矣  
而其時反者不特三桂延齡精忠也又有襄陽總兵楊  
來嘉叛於穀城河北總兵蔡祿叛於懷慶江西則饒州

兵變餘千賊蜂起騷及江南之徽州別賊陷湖口彭澤  
江南之池州亦有賊竊發

上以賊渠乃三桂也三桂滅則諸賊自散趣察尼分兵  
急攻岳州僞將軍吳應麒據守堅不可拔乃又命貝勒  
尚善爲安遠靖寇大將軍貝子彰泰副之專攻岳其餘  
諸省則以貝勒洞鄂爲定西大將軍與莫洛由陝勦蜀  
康親王傑書爲奉命大將軍由浙勦閩孫延齡之叛提  
督馬雄亦以柳州降賊則命尚可喜及總督金光祖勦  
禦而以安親王岳樂爲定遠平寇大將軍繼之分遣甫  
定忽又有王輔臣之變輔臣本姜瓖部校瓖反時殺瓖



來降擢侍衛從大兵定湖南入黔滇隸三桂部下久擢  
至今官三桂初反時誘以偽劄輔臣令其子繼禎入京  
呈首

上嘉之特給世職并繼禎四品官尋又陰通三桂至是  
從莫洛進寧羌忽反兵攻莫洛戕之遂回平涼據守此  
皆十三年事也十四年秦州蘭州鞏昌定邊靖邊臨洮  
慶陽綏德延安相繼失時三桂散偽劄各路煽誘給輔  
臣軍資數十萬又令賊將王屏藩吳之茂等出蜀肆擾  
故所在響應惟提督張勇總兵孫思克王進寶陳福不  
從陝省得不全陷已而諸將先後復秦蘭延鞏諸郡獨

輔臣據平涼悉其精銳依山結壘勢張甚三桂親至松  
滋遙與相倚將入犯彝陵荊州我湖南諸將方奉命  
進兵岳州長沙以分賊勢而吳應麒於岳州城外浚濠  
三重設陷坑木椿守益固長沙則賊將馬寶來援亦堅  
拒不下諸將皆不能尺寸進耿精忠既據全閩又遣賊  
陷浙之温州黃巖處州及江西之建昌撫州廣信諸郡  
廣東潮州總兵劉進忠碣石總兵苗之秀亦與通潮惠  
並失時杭州將軍賴塔總督李之芳以兵扼衢州賊不  
得過衢而陸路有偽都督曾養性偽將軍祖宏勳等連  
屯二十五營於長石嶺諸處水路則有偽都督朱飛熊



張萬恭許英等率水賊萬餘舟三百分泊於小梁山諸處浙東危甚傑書大兵至亦觀望不敢進屢奉 詔趣督始進兵瑪哈達復處州傅拉塔復黃巖而温州爲會養性踞守迄不下江西之地精忠旣陷其東數郡三桂又遣僞總督黃乃忠等合兵數萬自萍鄉窺袁州西路亦告急先是

上以江西賊衆命岳樂停往粵西留江西辦賊至是以簡親王喇布爲揚威大將軍自江南移江西代之趣岳樂進兵長沙岳樂畏三桂凶燄而閩事差易藉手也已率兵復建昌令額楚復廣信希爾根復饒州欲由江西

入閩辦賊

上不許趣赴長沙益急此十四年事也計此二年中叛變四起秦蜀楚粵閩浙如鼎沸選將調兵轉餉日不暇給自古藩鎮之亂未有甚於是時者十五年春以洞鄂等屯兵平涼久不克命圖海爲撫遠大將軍往莅師三桂方遣王屏藩出漢中譚洪出西河吳之茂出單家河合犯秦州爲輔臣聲援并令雲南土司總兵陸道清率猓猓入平涼助守圖海至督諸將一戰大敗賊於平涼城下輔臣懼遂率僞巡撫陳彭僞總兵周揚名王好問及陸道清等降王屏藩等遁自是秦省略定會閩賊耿



繼祚再入建昌肆焚掠忽棄營去

上知閩中必有海寇入故撤兵自救乃趣傑書賴塔速  
進兵敗偽將軍馬九玉於衢河西敗偽總兵林福於大  
溪灘乘勝復江山縣至仙霞關偽將金應虎獻關遂長  
驅入浦城建陽建寧相繼下曾養性聞之亦以温州降  
大兵抵延平精忠大懼先遣其子顯祚繳送偽印師至  
福州卒所屬文武出降於是閩浙亦定時東西兩巨寇  
既降乃得以全力辦三桂初三桂因王輔臣之變欲由  
秦蜀入犯及輔臣反正圖海等守陝無隙可乘而岳樂  
已由袁州進兵長沙三桂乃使胡國柱入長沙固守馬

寶營城外爲犄角而親率兵自松滋來屯嶽麓山盡調  
夔陵南漳諸賊楊來嘉洪福等至合力抗拒別使偽將  
軍高大節率衆數萬圍吉安以梗入粵之路陰結尚之  
信授爲招討大將軍之信遂反遣人禁其父可喜於私  
第率藩下人易旗改服擊將軍舒恕於省城恕引兵出  
走副都統莽依圖自肇慶突圍出總督金光祖巡撫佟  
養鉅皆降之韶州南雄相繼陷舒恕等走南安南安又  
陷乃守贛州孫延齡馬雄皆助三桂遣兵寇江西高大  
節已破吉安入城守

上預知賊不得逞於秦必力保湖南拒守乃趣勒爾錦



藝海珠塵  
察尼尚善等分路進兵勒爾錦敗賊於虎渡口察尼敗賊於太平街尚善遣舟師入洞庭克復君山已而勒爾錦等再戰不利引還尚善舟師亦未能斷賊餉道又詔將軍穆占爲征南將軍自陝率滿洲兵及輔臣降兵至荊州并選荊州兵之精銳者率以助攻長沙賊方擾醴陵萍鄉欲斷岳樂後路喇布自江西分兵禦之賊之陷吉安者將軍哈爾噶齊等圍之此十五年事也十六年春吉安賊遁莽依圖乃進兵南安原任提督嚴自明以城降賊黨郭義亦遁我師遂踰嶺克南雄直至韶州有僞監軍道傅宏烈先以書來謂大兵速進廣東則廣

西一省宏烈可以一面當之至是來迎於韶尚之信聞大兵入粵先遣其弟之瑛迎降金光祖亦自肇慶至時可喜已歿命之信仍襲其父爵之信以書招原任高州總兵祖澤清澤清亦以高雷廉三郡降原任瓊州總兵佟國卿亦以瓊州降於是廣東粗定耿精忠之歸順也

上命率其藩下兵隨征海寇時海寇鄭錦連陷汀漳興泉邵武諸郡我兵以次收復劉進忠苗之秀亦以潮州碣石來歸錦部將劉國軒在惠州揚帆去於是海寇亦稍靖精忠以海寇平奏請入京服罪其屬下徐朝弼等



首告精忠雖歸降仍遣王進功通海寇與劉進忠結腹  
心藏黑鉛於王昇家欲俟大兵旋日再作亂將降之前  
三日殺范承謨以滅口又遣王子玉至三桂處乞援  
上命議政王等按其事皆實凌遲處死於是閩逆之局  
亦結三桂既失輔臣精忠之信等援勢漸孤乃爲畫地  
死守計以衡州爲僞都自長沙移居之聯絡孫延齡馬  
雄等爲肘腋助時岳樂攻長沙穆占及喇布攻衡永皆  
未克賊增兵自宜章樂昌悉力來拒尚之信雖已反正  
仍與三桂通三桂陰援之遣胡國柱馬寶再犯韶州額  
楚與之大戰莽依圖出城夾擊賊始遁此十六年事也

十七年穆占進復郴州桂陽興寧宜章諸處又招降僞  
總兵王商等僞將軍林興珠詣尚善降賊乃盡銳逼永  
興而我軍都統伊里布戰歿再戰副都統哈克三又歿  
碩岱立思孝營壘悉被衝賊據之環攻永興碩岱等入  
城死守喇布不敢救穆占遣布舒庫尼雅漢來援亦不  
敢進賊三面攻圍自八月二日至二十日晝夜不息城  
壞於礮以竹籬布囊盛土補之且築且戰瀕危者屢矣  
二十一日賊忽拔營去乃三桂已死諸賊皆赴衡州故  
也三桂初病有犬登其案而嗥已而膈噎症益劇又下  
痢遂於是月十七日死賊黨吳國貴夏國相祕不發喪



藝海珠塵  
三  
潛調永興諸賊胡國柱等至仍謀拒守時尚善已歿於岳州以察尼爲安遠大將軍赴岳統其軍先是林興珠之降也謂岳城糧皆取給於常德而我舟師僅營於君山賊之往來如故也宜分泊於香爐峽諸處并立陸營於九貴山以斷長沙衡州之路賊可坐困上是之命察尼如其法以困岳水陸之圍始密賊將杜輝潛遣人來約降事泄爲吳應麒絞死城中糧日乏我兵乃急攻之十八年正月僞總兵王度冲陳珀降應麒棄城遁官兵遂復岳州岳州旣復長沙震恐賊將皆棄城去我師由長沙進衡州吳國貴夏國相等亦遁我師

人衡州追敗國貴於永州復其城國貴等踞武岡與胡國柱死守林興珠奮擊敗之國貴中礮死餘賊遁彭泰又追敗之遂復武岡喇布遣提督趙賴取寶慶寶慶亦復時勒爾錦等在荊州亦渡江勦賊賊已潰所過松滋枝江宜都諸縣皆下并復澧州僞將軍洪福以舟師降貝子準達進常德賊已焚廬舍舟楫去而三桂孫世璠在雲南已僭卽僞位勒爾錦等奏胡國柱在辰龍關吳應麒在辰州以木石塞隘口跨路立五營山路險惡止行一馬其陡絕處徒步亦難上

上切責之乃命察尼辦澧州以南軍事勒爾錦辦荊岳



夔襄軍事以岳樂勤勞久命率大兵之半還京以彰泰  
爲定遠平寇大將軍代之進取雲貴此由湖南入滇黔  
之師也先是十六年傅宏烈之降授爲廣西巡撫撫蠻  
滅寇將軍令募兵進取廣西莽依圖額楚旣敗賊於韶  
命額楚守韶莽依圖隨宏烈後繼進會馬雄與孫延齡  
交惡治兵相攻宏烈等遂乘機進克梧州招潯州鬱林  
皆下之直抵平樂延齡已爲吳世琮殺死世琮水陸來  
犯宏烈等戰不利引兵退十七年戰於賀戰於藤又敗  
賊直逼梧州是時三桂已死而世琮在廣西轉猖獗十  
八年正月宏烈莽依圖率死士奮擊大敗賊始復潯州

馬雄已死其子承廕率僞將齊人龍等降世琮圍之於  
南寧承廕守頗力莽依圖進敗賊於新村世琮負傷走  
南寧圍解并復太平府命莽依圖卽由南寧進雲南宏  
烈亦請由慶遠進雲南

上壯其志以喇布代守桂林聽宏烈進師十九年承廕  
又給殺宏烈以叛粵地再擾於是命駐守潮州之將軍  
賴塔帥師守廣東初尚之信雖降仍懷兩端趣其援宐  
章援韶州援梧州皆托故不行三桂死始聽調從征廣  
西至是之信護衛張永祥張士選赴京首其謀叛事  
上命侍郎宐昌阿以巡海爲名赴粵密按其狀部將王



國棟證之事皆實宜昌阿密檄金光祖執之信於武宣  
之信弟之節等在省城聞變殺國棟欲爲亂賴塔以兵  
圍其第皆就擒之信等伏誅粵東得不擾會莽依圖疾  
歿於軍乃命賴塔爲大將軍代莽依圖進取雲南此由  
粵人滇之師也諸將之在秦省者自平王輔臣後以秦  
民勞敝暫停進蜀及三桂死 詔圖海進京面授機宜  
始議進兵諸將張勇孫思克猶請俟時惟提督趙良棟  
王進寶請身任其事十八年十月進寶復鳳縣克武關  
擒偽總兵羅朝興直抵漢中王屏藩遁我兵分三路趨  
保寧十九年正月賊二萬餘來拒進寶大敗之追至錦

屏山賊營於城外我兵奪橋而進遂克保寧王屏藩及  
偽將軍陳君極自經死生擒吳之茂等乘勝至順慶順  
慶亦復趙良棟之分路進蜀也先遣兵復徽州由略陽  
進克陽平關十九年正月從白水壩渡江龍安府偽總  
兵姜應熊降遂復龍安至明月江城斷橋拒守良棟趣  
兵浮渡令總兵王進才等分兩路取成都自率大兵繼  
進偽將軍汪文元降於綿竹至成都偽巡撫張文德率  
文武出降遂復成都圖海亦以是時復興安府楊來嘉  
尚擾夔巫間提督徐治都擊敗之於巫山來嘉道夔州  
亦復譚洪率所部降將軍烏丹克重慶彭時亨亦降趙



良棟敗胡國柱於建昌遂率兵進雲南此由蜀入滇之師也時察尼在湖南已克辰龍關進取辰州總督蔡毓榮又復銅仁府及麻陽縣於是命彰泰速進雲貴其滿兵無馬者撤之令察尼率以還京勒爾錦傑書亦先後撤兵還圖海率王輔臣還輔臣至陝西自縊死八月彰泰蔡毓榮自沅州進十月克鎮遠府偏橋平越龍里以次收復抵貴陽吳應麒先遁遂復貴陽遣提督桑額據雞公背鐵索橋諸險招李本深降之其餘安順石阡等府相繼下貴州悉定會賴塔自廣西進兵亦屢捷二十一年正月朔抵安籠所敗偽將軍何繼祖於石門坎遂復

安籠繼祖遁去合偽將軍詹養等率數萬衆陣於黃草壩列鹿角挨牌驅象助戰二月二日我兵自卯戰至晡大敗其衆奪二十二營生擒詹養王有功等獲象馬無算二十一日彰泰賴塔兩路兵遂會於曲靖整隊合進屯雲南省城十里外之歸化寺送酋吳世璠遣偽將軍胡國柄劉起龍黃明等率賊數萬來拒我兵大敗之陣斬國柄起龍追殺至城下掘長濠困之而趙良棟之師亦自蜀至圍益密先是賊因官兵進勦欲分我兵力遣胡國柱夏國相馬寶等分陷建昌敘州永寧馬湖諸處又嗾譚洪彭時亨再叛擾夔巫間至是世璠以省城危



急調諸賊回救

上預敕諸將各路追躡弗令得至省城於是諸將奮擊  
遂無一得至省者偽將軍韓天福與土司那天鳳縛偽  
總兵王來吉以武定降穆占敗偽將軍楊應選於平遠  
遣人招之亦降偽定遠大將軍張國柱偽總兵徐夷則  
李三彬羅文獻郭壯興范應泰各率所部降偽將軍李  
發美舉首世璠所與達賴喇嘛書以麗江鶴慶二府降  
譚洪已死其子天祕亦降馬寶遁於楚雄衆盡潰與偽  
將軍巴養元偕降

上命械寶至京磔之雲南省城有潛出降者謂世璠勢

已蹙惟堅守待外援十月八日彰泰等遂合楚粵蜀諸  
路兵并力環攻連日夕不息二十八日偽將軍線緘吳  
國柱吳世吉原任都統何進忠林天擎等謀執世璠及  
郭壯圖以獻世璠聞變自殺壯圖及子宗汾亦自殺二  
十九日線緘等開門降遂擒偽大學士方光琛等磔之  
戮世璠尸傳首京師夏國相竄於廣南尋亦來降彰泰  
以其爲三桂壻送京師伏誅胡國柱遁於雲龍州度不  
能脫自縊死其餘偽文武官皆降雲南底定

上乃盡撤滇粵閩藩下兵歸京師贈卹殉節諸臣甘文  
焜范承謨朱國治馬維鎮傅宏烈等分別諸將功罪黜



防之其滿洲兵出征時貸子錢治裝者發帑代之償大赦天下與民休息從此內地不復用兵億萬年丕丕基定於此矣

敬惟我 國家武功之盛懿燦千古而所以靖反側開治平尤莫如平定三逆之舉蓋 國初摧廓西南陲未嘗不藉諸藩之力及留鎮既久據巖疆擁強兵皆樂於威福自擅一旦欲撤之使歸必非其所願而不撤則又將成方鎮分據之勢日久愈不可制止昔人所謂召則反速而禍小不召則反遲而禍大也然反速禍小亦有

非可概論者是時我 國家定鼎纔三十年西南陲之入板圖并未及三十年人心猶未寧一而三藩分駐滇黔閩粵幾半天下又非如唐時河朔三鎮之僅據燕趙千里之地也吳三桂在諸藩中尤雄狡陰蓄異志播流言結死黨以虛聲煽天下天下皆震其威一舉事未有不響應者是非廟堂有必勝之策輕率下詔將一發難收無以善後故當時諸王大臣皆不敢專主撤藩各有兩議以上我

聖祖仁皇帝年方二十餘獨內斷於心毅然撤之不疑





詔一下而三桂果反反而諸藩果相繼起加以  
孫延齡王輔臣之助逆察哈爾之俶擾幾於東  
西南北在在鼎沸而廟謨鎮定不動聲色卒  
能以次削平開一統無外之治後之論者但仰  
神功聖烈之巍巍謂有天授非人力可及今得平定三  
逆方略讀之而後知當日不得已用兵之苦心  
與夫應變靖亂之長策遠慮蓋夙夜焦勞者凡  
七八年始克耆定而非輕付一擲以倖成也當  
撤藩之始固默計與朝兵力足以制叛而有餘  
而初未嘗懼以威也詔諭諄懃開誠宣示無非

欲延恩於弗替銷亂於未萌使諸藩知順逆釋  
兵歸朝析圭擔爵傳及後裔豈非旂常帶礪之  
盛事乃狂悖失計輒敢連衡拒命

聖祖始遣將出師以伸國法然猶擴如天之度許以自  
新凡賊黨之自拔來歸者悉仍其官位坦懷待  
之蓋力既足以制其死命而恩又足以開其生  
路故輔臣及精忠之信等雖已罪不勝誅猶恃  
道死之詔回面自投不待窮極兵勢而後取之  
此息事寧人之出於至誠使叛賊亦知感悔早  
可省兵力十之二三也諸將之討逆也視劇賊



所在率逡巡不敢進徒藉手於一城一邑以報  
塞

聖主灼見其情趣諸將舍賊黨而專力渠魁兵少增兵  
餉少增餉故王耿二逆終至力屈歸命又以三  
桂為諸叛之首三桂滅則諸叛易討特宿重兵  
於荆岳長沙以扼其要害賊鋒雖銳終不能出  
湖南一步後卒由此進兵收功此勝算獨操所  
由制勝於萬里之外者也自用兵以來僅戮一  
不救王帥之偏裨以徇於軍而未嘗殺一大將  
即諸統兵者之斤斤畫地自守經年累月屢催

不進律以老師糜餉之罪萬無可辭猶僅下詔  
嚴飭交王大臣議奏終責以後效而不遽加斥  
革蓋其時漢人既不可信漢軍亦多有與諸藩  
同氣類者所恃惟宗室王公及滿洲大臣故訓  
之勵之終不得已而用之此更用人之苦棄過  
錄功而卒收孟明之效者也統計康熙十二年  
至十七八年軍事旁午宏濟艱難聽鈴索之撼  
聲警銅籤之投響古聖王自朝至於日中昃不  
遑暇食殆無以過之自三逆殄而內地不復用  
兵迄於今承平百餘年矣當日戰爭之地久長





桑麻無復斷斨折戟之遺跡問之故老亦莫有能記討逆舊事者閭井宴如白首不見兵革人但謂生長太平得享此熙恬之福也而豈知皆我

聖祖宵衣旰食圖寧求莫之所留貽也哉

平定朔漠述略

厄魯特準噶爾者本元阿魯台部其後聲訛為厄魯特國初時其酋顧實汗嘗遣使通貢後有噶爾丹者出自北厄魯特漸強盛自立為汗侵掠其鄰喀爾喀部喀爾喀故有二汗左翼號土謝圖汗右翼號車臣汗其地在

我四十九旗蒙古之北與準噶爾接壤至是為所侵擾勢不支康熙二十七年二汗全部來降

聖祖仁皇帝受而賑撫之遣使諭噶爾丹息兵以靖兩國噶爾丹佯應命而阻兵如故喀爾喀不敢游牧於故地避入我邊境二十九年

上命尚書阿爾尼備邊會厄魯特驅掠喀爾喀人畜過阿爾尼以蒙古兵擊之而令喀爾喀奪還所掠喀爾喀務爭取陣遂亂厄魯特因而乘之我兵反為所敗乃以裕親王福全為撫遠大將軍恭親王常寧為安北大將軍出師至烏闐布通大敗其眾噶爾丹始以書來乞和





然弗俊也其兄子策妄阿拉布坦亦爲所凌虐嘗遣間使來附

上遣使報之至哈密爲厄魯特所害詔索其害使臣者噶爾丹不應二十三年約其來會盟亦不報而擾喀爾喀益甚

上念喀爾喀爲我外藩不庇之使安游牧勢將以近邊蒙古地處之則蒙古生計亦受害自非大創噶爾丹不可乃決計用兵又恐我兵至而敵先遁也三十四年土謝圖親王沙津來覲於木蘭具言噶爾丹約其爲內應將入犯

上命沙津僞與相結誘其兵來是秋噶爾丹果掠喀爾喀之納木札爾陀音所部駐兵於土喇及克魯倫河之間自秋徂冬不去我朝三遣使往皆爲所辱令使者步行歸三十五年春乃兩路出師

上親統六師向克魯倫河進發命撫遠大將軍伯費揚古率將軍孫思克總兵康調元等向土喇進發預刻時日約東西夾攻途次有傳噶爾丹率兵三萬又借俄羅斯兵六萬來者內大臣索額圖大學士伊桑阿奏請迴鑿

上力斥之四月下旬至西巴爾台探知噶爾丹尚在克



魯倫河而費揚古兵至何處尚未奏到隨行王大臣有謂宜俟費揚古兵至夾擊者有謂宜先遣使噶爾丹告以御駕親來者有謂不必俟費揚古兵亦不必遣使噶爾丹即當出其不意直前突擊者五月四日至拖陵乃遣使噶爾丹明告以六師親莅并以所獲之厄魯特俄齊爾偕往噶爾丹初不信謂

中華皇帝不在京城享安樂而陟此沙漠乎及問之俄齊爾具述黃幄幔城等物乃大驚親上孟納爾山竊觀我兵隊伍嚴整士馬精強不復敢戰聞我西路兵已過土喇謂其下曰北路兵不可擊且擊西路遂乘夜遁閱

五日

上至克魯倫河方意其扼河相拒而河岸已無一帳矣大兵追三日不及乃簡輕騎命內大臣馬思喀速追十三日

上迴鑾是日費揚古兵已至昭莫多探知噶爾丹在特勒克濟相距僅二十里遣碩岱以少兵誘之孫思克陣於東占高阜以臨之康調元陣於西兵皆下馬步列以待噶爾丹果以萬眾來我軍鳥槍弓矢齊發藤牌兵繼之每進輒以拒馬木擁於後示必死無退避自未至西戰數十合敵將敗我軍鳴角齊上馬蹂之敵遂大奔追





殺三十餘里斬數千級生擒數百人牛二萬餘羊四萬  
餘軍資器械無算噶爾丹之妻阿奴喀通亦死於亂兵  
其他台吉宰桑陣歿者不可數計投費揚古軍者二千  
餘人投馬思喀軍者五百餘人  
上回蹕至塔爾奇捷奏至凡喀爾喀王公台吉以及老  
幼男婦無不泥首膜拜謂  
聖王安輯我喀爾喀不惜士馬芻糧且親履沙磧以  
懲此凶醜我喀爾喀從此得仰父俯子矣六月駕回  
京噶爾丹既敗後牲畜盡失無可資生與諸台吉會於  
塔米爾噶爾丹欲往翁金丹濟喇欲往阿爾台阿賴卜

灘及丹津俄木布欲往俄羅斯邊境皆無定議已而丹  
津俄木布之人有盜噶爾丹部內羊馬者噶爾丹責令  
還原主遂有隙丹津俄木布旋叛去惟丹濟喇及阿賴  
卜灘尚隨之又有諾顏格隆及吳爾占扎卜等亦率其  
屬以從然所屬各不過千人少僅數百人  
上欲乘勢遂滅之秋九月駕再發京師往歸化城經  
理其事傲論青海諸台吉協擒噶爾丹諭策妄阿拉布  
坦亦如之又多遣間使招其黨與時噶爾丹欲掠喀爾  
喀之出邊游牧者聞有備遂不敢翁金有我軍所餘糧  
噶爾丹欲資以度冬使丹濟喇來劫適我副都統祖良





壁護糧歸途次賊突出我護糧兵不及甲卽與戰良壁以殿後兵繼之前行兵又回鬪遂大敗去其遣往達賴喇嘛之使人喇克巴過青海又爲我副都統阿南達所擒有台吉阿玉奇及額爾克巴圖皆承檄與策妄阿拉布坦會於阿爾台約共擒噶爾丹自効噶爾丹聞之遂向白格爾西去十二月 駕回京三十六年春噶爾丹之子塞卜騰巴爾珠爾捕獸於巴爾思庫兒我哈密回目都拉達爾罕遣子郭帕擊擒之俘送京師二月 上又啟鑾往寧夏時噶爾丹竄於薩克薩呼里克資野獸以給然迄無降意我員外郎博什希筆帖式常受奉

命往諭之噶爾丹遣人取書去閱數日見使臣於野傳語數言而去其倔強如故也薩克薩呼里克獸已盡勢益蹙一日與諸台吉飲於諾顏格隆家吳爾占扎卜出怨言謂此地獸已盡矣如願降中國則往投否則立另爲計今爲爾一人致四部厄魯特七旗喀爾喀皆破壞尚何所圖也諾顏格隆以酒和解之而其下多攜貳阿賴卜灘亦與丹津俄木布往投策妄阿拉布坦囑我使臣代奏并遣間使入覲丹濟喇亦先輸情於我使臣噶爾丹召之丹濟喇曰既有程布臧布矣召我何爲遂不赴又有台吉阿喇兒拜及拉思倫博羅齊等與噶爾丹



相距或半日程或一二日程皆偃蹇不用命

上至寧夏趨白塔方臨黃河發大兵起行適費揚古奏  
至噶爾丹已於三月十三日死矣傳聞謀食無資部眾  
盡潰故仰藥自盡也丹濟喇攜其屍及其女鍾濟海來  
降途次為策妄阿拉布坦奪去丹濟喇自率所部降阿  
賴卜灘亦降已而策妄阿拉布坦遣人獻噶爾丹之屍  
及鍾濟海至京於是朔漠大定喀爾喀得安游牧至今  
百餘年氈帳滿野數百萬眾無不得所皆我

聖祖三駕親征所以奠安而衽席之也尋授塞卜騰巴  
爾珠爾為一等侍衛鍾濟海至命與同居使侍衛沙克

都爾娶之尤見格外矜宥之仁云

白策妄阿拉布坦獻噶爾丹之屍  
聖祖仁皇帝嘉其恭順恩賚有加無何狼子野心漸狂  
悖承噶爾丹潰敗之後收其餘眾哀集孳育日益以強  
康熙五十四年來擾哈密我駐防哈密之游擊潘至善

皇朝武功紀盛一

皇朝武功紀盛一

一





相距或半日程或一二日程皆偃蹇不用命  
上至寧夏趨白塔方臨黃河發大兵起行適費揚古奏  
至噶爾丹已於三月十三日死矣傳聞謀食無資部眾  
盡潰故仰藥自盡也丹齊利瑪七

降途

續

噶爾丹之次貝勒於休養之二十

藝海珠塵

商漚 吳 伯通 泉之輔  
嘉興 陳 光鑾 金士校

皇朝武功紀盛

趙 翼纂

平定準噶爾前編述畧

自策妄阿拉布坦獻噶爾丹之屍及鍾濟海

聖祖仁皇帝嘉其恭順恩資有加無何狼子野心漸狂  
倖承噶爾丹潰敗之後收其餘眾哀集孳育日益以強  
康熙五十四年來擾哈密我駐防哈密之游擊潘至善

皇朝武功紀盛

皇朝武功紀盛

一





臣之肅州總兵路振聲出兵應援敵始去自是我朝  
常發兵備邊五十六年以內大臣傅爾丹為振武將軍  
駐阿爾台尚書富寧安為靖逆將軍駐巴里坤散秩大  
臣祁里德為協理將軍在西路策應是年冬策妄阿拉  
布多子策零敦多卜侵西藏藏中酋長曰拉藏汗與  
達賴喇嘛及班禪額爾得尼退守布達賴五十七年命  
侍衛色楞罕西寧兵會同青海王台吉等進援總督額  
倫特繼之未至而拉藏汗已為敵所殺額倫特敗敵於  
齊諾郭勒色楞敗敵於喀喇烏蘇等合兵進剿八月朔  
日敵大至額倫特中槍殞我師敗績乃命皇子允禩

為撫遠大將軍率重兵駐西寧五十八年分遣平逆將  
軍延信由青海定西將軍噶爾弼由打箭爐兩路進兵  
收復藏地傅爾丹富寧安祁里德等亦由西北兩路襲  
擊以分敵勢富寧安至闢展降回衆三百餘至土魯番  
降番衆千餘祁里德亦降厄魯特宰桑塞卜騰等二千  
餘傅爾丹至格爾額爾格殺厄魯特二百餘擒宰桑貝  
肯等百餘然皆未深入也八月延信兵與小策零敦多  
卜戰於密諾郭勒綽瑪喇等處皆捷噶爾弼由南路乘  
虛入聞春不宰桑以兵來拒及其未至先克墨朱工喀  
所至望風歸款朱貢之胡土克圖獻地降第巴達克咱





及喇嘛鍾科爾亦降即令聚皮船渡河乘勢直抵西藏  
藏中大小頭目及各寺喇嘛俱歡迎恐後盡擒獻準噶  
爾喇嘛百餘人其策零敦多卜所授為總管者俱斬於  
軍前西藏遂復雍正元年青海王羅卜藏丹津叛以陝  
督年羹堯為撫遠大將軍提督岳鍾琪為奮威將軍入  
平之羅卜藏丹津走投策妄阿拉布坦

世宗憲皇帝遣使索之不奉 詔惟遵 旨定邊界約  
不入犯乃撤兩路兵量留兵哈密護其耕作五年策妄  
阿拉布坦死子噶爾丹策零襲凶狡好亂過於其父又  
集兵窺邊乃復以傅爾丹為靖遠大將軍駐阿爾台岳

鍾琪為寧遠大將軍駐巴里坤噶爾丹策零遣小策零  
敦多卜以一萬眾犯科舍圖掠駝馬總兵樊廷副將冶  
大雄拒退之九年六月傅爾丹出師敗績於和通淖兒  
兵二萬得歸者僅二千餘岳鍾琪聞傅爾丹被圍急出  
師遙為聲援亦不能大獲敵既得志益猖獗大策零敦  
多卜駐華額爾齊斯小策零敦多卜駐喀喇額爾齊斯  
日伺釁擾邊時方築城於科卜多以地遠難守命移營  
於察罕庫爾以順承親王錫保為靖遠大將軍鎮之降  
傅爾丹仍為振武將軍又以馬爾賽為綏遠將軍駐歸  
化城為犄角兩策零敦多卜一由郭多里一由杭愛來





掠喀爾喀公通摩克兩佐領人畜爲所擄通摩克率所部內移小策零敦多卜之子曼濟又掠鄂爾海大策零敦多卜自率大衆屯蘇克阿勒達錫保令喀爾喀親王丹津多爾濟及額駙策凌與戰鄂登楚克敗之敵始去十年又有塞卜騰策零那木札爾由烏魯木齊來擾哈密岳鍾琪遣總兵曹勳副將紀成斌拒之秋噶爾丹策零傾國入寇至額駙策凌所部策凌方入朝遂盡掠其貨畜二子一妾亦爲所得策凌拒途聞之割辮髮及所乘馬尾誓以死復讐途次借各蒙古兵回救噶爾丹策零方據其子女玉帛酣飲爲樂策凌夜半由閒道繞出

山後黎明自山頂大呼壓而下敵驚起人不及甲馬不及鞍棄其軍貨倉猝遁策凌追及之於額爾得尼招左阻山有限大水敵無路走我兵乘勢蹙之擊殺萬餘尸滿山谷河水數十里皆赤噶爾丹策零由鄂爾昆竄去策凌急檄馬爾賽出歸化城截殺副將軍達爾濟整兵待發馬爾賽不許副都統傅鼐至跪求出兵亦不許軍士登城望見敵騎由城下過如亂鴉投林紛雜無行列一邀擊可盡擒也翼日將士不稟命自出追之噶爾丹策零已從前隊過僅截其零騎馬爾賽由是伏法而噶爾丹策零勢亦衰不復敢擾邊等遣人來議和十二年



遣傅鼐及學士阿克敦報之

今上御極噶爾丹策零又遣使來以所議邊界不決使命往返乾隆四年始定議厄魯特游牧不得過阿爾台喀爾喀游牧不得過扎卜堪兩國各遵守已又許其通市易及進藏作佛事人馬貨物各限以數乃盡撤西北兩路兵計自康熙五十六年備兵以來中間雖暫撤不數年旋復設前後費軍費不下七千餘萬至是始寢兵不用蓋敵擾則制之以力敵服則撫之以恩

聖祖

世宗攘剔之勞我

皇上懷柔之畧各因時而施固未嘗稍損國威亦未嘗輕用兵力使喀爾丹策零子孫粗能自立保境睦鄰我皇上亦惟以息事寧人爲念豈必欲草薶而禽獮之道至篡亂相仍自取覆滅天厭其德授我國家以兼弱攻昧之機然後一舉蕩平之則我皇上始念固不到此耳

平定準噶爾正編述畧

乾隆十年噶爾丹策零死其子策妄多爾濟那木扎爾嗣位昏暴不恤國事十五年其姊賽音伯勒克弒之立其庶兄喇嘛達爾扎本噶爾丹策零外婦所生子也有



藝海珠塵 五  
大策零敦多卜之孫達瓦齊於喇嘛達爾扎爲近屬喇  
嘛達爾扎忌之達瓦齊擁衆不應召輝特台吉阿睦爾  
撒納者最狡黠欲構達瓦齊篡亂而已從後圖之乃與  
達瓦齊合兵突入伊犁弑喇嘛達爾扎達瓦齊遂自立  
爲汗阿睦爾撒納欲襲之而力不敵十九年遂與都爾  
伯特台吉訥默庫和碩特台吉班珠爾率所部二萬餘  
人來降且乞師往靖亂其意欲藉我兵力滅達瓦齊而  
已得據其處也先是喇嘛達爾扎之立以台吉達什達  
瓦素爲策妄多爾濟那木扎爾所任用執而廢之欲以  
其部衆分賞各台吉其部下有害桑薩賴爾不肖他屬

率千戶來降

上授爲散秩大臣詢以準夷事備悉其內亂狀然尙未  
欲用兵也迨達瓦齊之篡有杜爾伯特台吉策凌及策  
凌吳巴什率三千餘戶來降  
上益悉其情形亾可企足待

聖祖

世宗數十年厲兵秣馬欲殄滅之而不能者今事會適  
有可乘是天以準噶爾畀我大清時不可失於是用兵  
之策遂決方調兵籌餉以圖大舉而阿睦爾撒納來降  
上自薩賴爾降後卽知有阿睦爾撒納爲衆部所畏服



茲敏關內附正可資以前驅迅掃殘孽而舉朝不知其故也承平日久方樂於宴安無事不願有勞師動衆之舉尚書舒赫德奉命往撫阿睦爾撒納輒請留其壯丁於烏里雅蘇軍營而部落悉徙蘇尼特使不得聚而生變

上謂若是適使其疑畏也斥罷之更以尚書班第往輯其衆俾游牧於扎小堪阿睦爾撒納等入覲於熱河上封爲親王訥默庫珠爾皆封郡王所以寵賚之者甚至二十年春遂兩路出師北路以班第爲定北將軍阿睦爾撒納爲定邊左副將軍副之西路以陝督永常

爲定西將軍薩賴爾爲定邊右副將軍副之所至準夷各部落大者數千戶小者數百戶無不攜醢酪獻羊馬跪迎恐後兩路兵行數千里無一人抗顏行者五月五日齊抵伊犁達瓦齊已遁於格登山阻淖爲營衆尙萬餘我兵追及之侍衛阿玉錫夜以二十二騎直薄其營呼噪突入賊萬衆驚潰達瓦齊竄於呼爾噶回酋霍集斯伯克承檄縛獻軍門并獲青海叛賊羅卜藏丹津及前歲已降復叛之巴朗先後檻送入京行獻俘禮上御午門樓受之策勲行賞賜阿睦爾撒納食親王雙俸班第薩賴爾爵上公餘進秩有差是役也出師僅百



餘日不傷一兵不折一矢犁庭掃穴生縛名王沙漠萬里悉入版宇信自古未有之駿烈也厄魯特之先故有四衛拉特華言四大部也部各有汗上之初用兵也欲俟平定後仍其舊設四汗衆建以分其勢可以銷亂萌息邊釁如喀爾喀之編七旗至今長享太平而阿睦爾撒納志不在此也

上預燭其情甫出兵卽密諭班第示以分封四汗之意以消其妄念又以額駙色布騰巴爾珠爾本科爾沁親王與阿睦爾撒納語言相通氣類相近令與阿睦爾撒納偕行俾耦俱無猜實陰伺察之乃額駙反與之昵阿

睦爾撒納遂恃爲奧援旣平伊犁

上命班第及西路參贊大臣鄂容安留伊犁與阿睦爾撒納薩賴爾共籌善後事阿睦爾撒納輒隱以汗自處事多不稟承將軍生殺任意置副將軍印不用用其國汗舊傳小紅鈴記發書鄰部哈薩克及俄羅斯之烏梁海皆不言降我朝但謂率滿洲蒙古兵來定準噶爾又使其黨布流言謂不立阿睦爾撒納爲汗終不得寧帖班第鄂容安密以其事馳奏

上命卽軍中誅之母濡忍貽後患而是時大兵已撤回隨將軍者僅五百兵其餘皆厄魯特也班第等遂不敢



舉事

上先有旨令阿睦爾撒納以九月至熱河行飲至禮班  
 第等乃起其人覲欲使人我境則易擒也先是六月中  
 額駙奉 旨先回阿睦爾撒納私以總統四部之意乞  
 其代奏并約畧時日如得請則 恩旨當以七月下旬  
 至相與要約而別及額駙歸竟不敢奏而阿睦爾撒納  
 待 命久不至以人覲期迫班第又令喀爾喀親王額  
 林沁多爾濟伴行阿睦爾撒納不得已自伊犁起行途  
 次屢遷延猶有所望也迨八月中旬尙無信疑事已中  
 變恐人覲且得禍十九日行至烏隆古距其舊游牧僅

一日程詭稱歸辦裝以副將軍印付額林沁多爾濟使  
 先行約一二日即追及遂率所屬逃去額林沁多爾濟  
 久之始悟其給已急追之已不及阿逆以下皆稱阿逆寄聲伊  
 犁衆厄魯特喚其反又使其黨阿巴噶斯哈丹等掠西  
 路軍臺先已潛遣人來迎其妻子及部衆於扎卜堪賴  
 上先事籌及馳諭烏里雅蘇軍營備之其妻子等遂不  
 得去而伊犁宰桑克什木敦多卜曼集等果蠶起爲亂  
 二十三日班第鄂容安薩賴爾率五百兵奪路歸賊萬  
 衆圍之至空格斯薩賴爾先遁五百兵皆散班第鄂容  
 安自刎死定西將軍永常方駐木壘聞軍臺被掠六七





處悉賊大至乃退回巴里坤時新降諸台吉方覲於熱河

上封喀爾藏多爾濟爲綽羅斯汗沙克都爾曼集爲和碩特汗巴雅爾爲輝特汗其先降之策凌已封親王至是亦封爲杜爾伯特汗其餘宰桑尼瑪丹津巴桑厄魯錐音哈薩克錫喇等各授官賞銀幣皆願歸出兵協勦阿逆

上以額駙匿情不奏致誤軍事也革其爵發軍前効力額林沁多爾濟與阿逆偕行而聽其免脫也立賜之死又以永常懼怯退兵不足任逮問來京改命公策楞爲

定西將軍富德玉保達爾黨阿俱爲參贊大臣由巴里坤速進兵十一月師行玉保爲前隊諸降夷入覲後回游牧者亦各以兵從二十一年正月薩賴爾自伊犁脫歸迎大軍於土魯番玉保至特克勒探知阿逆僅距一日程急進可追及忽有報台吉諾爾布已擒阿逆來獻者玉保遂駐兵待之先以紅旗報捷於策楞策楞亦不暇審虛實卽以紅旗轉報入京而不知報擒阿逆者卽阿逆所遣慮我兵追及故以此緩師而已得逸去也二月策楞兵至伊犁阿逆已逃入哈薩克乃禡策楞玉保職用達爾黨阿爲定西將軍富德副之以擒阿逆事專



任此二人令直入哈薩克索取繼命巴里坤辦事大臣  
兆惠爲定邊右副將軍往軍營應援諸降夷在軍前者  
皆撤歸使得休息夏六月忽有喀爾喀郡王青滾雜卜  
撤軍臺之事北路郵驛本喀爾喀各部應役自用兵以  
來軍報絡繹需人馬頗多青滾雜卜苦之遂撤其所設  
臺文報中斷又以額林沁多爾濟之賜死謂我喀爾喀  
本青吉斯汗子孫例不治罪以此散流言衆喀爾喀惑  
之自十六臺至二十九臺一時盡撤乃以超勇親王策  
凌之子成袞扎布爲定邊左副將軍往剿捕又 命尙  
書納延泰侍郎阿桂等往各臺旋皆設達爾黨阿等之

追賊也至哈薩克界阿逆方借哈薩克兵來拒我兵擊  
敗之陣獲哈薩克人楚魯克等願往說其酋長阿布賚  
擒阿逆來獻阿布賚旋遣人送馬并爲阿逆乞命達爾  
黨阿不許使命往返迄數月未得賊

上以時將冬寒命達爾黨阿等撤兵由北路歸與成袞  
扎布協擒青滾雜卜是年冬阿桂追獲之始伏誅而西  
路諸降夷巴雅爾尼瑪噶爾藏多爾濟哈薩克錫喇等  
聞青滾雜卜之變亦羣起叛亂我副都統和起殲焉策  
楞玉保逮入京在途亦爲所害兆惠方駐兵濟爾哈朗  
聲息阻隔或傳其率兵出途次爲賊所截者巴里坤大



臣募人往探大風雪莫敢應有守備高天喜獨請行  
上亦命侍衛圖倫楚由巴里坤率兵往迎兆惠已率千  
五百兵轉戰而南自十一月起行戰於鄂壘戰於庫圖  
齊戰於闊勒奇前後殺賊數千二十二年正月至烏魯  
木齊諸賊皆會自十二日至十七日數十百戰我兵無  
不一當百然軍中無馬皆步行雪淖中履蹶亦多不完  
所食惟瘦駝疲馬且將盡二十三日特訥格爾不復  
能衝殺乃結營固守三十日圖倫楚兵至諸賊始解圍  
去兆惠得圖倫楚兵又往勦巴雅爾部落始回巴里坤  
是歲再出師擒阿逆并勦洗諸叛者

上以諸賊甫受封賞輒叛知厄魯特人概不可以恩信  
結故命成衮扎布出北路兆惠出西路皆於三月中  
起行會諸賊自相吞噬扎那噶爾布襲殺喝爾藏多爾  
濟呢瑪又欲襲扎那噶爾布不果阿逆自哈薩克歸會  
諸賊於博羅塔拉欲自立爲汗聞我兵將至又遁去諸  
賊皆竄匿於是兆惠擒原任內大臣巴桑鄂博什擒原  
任散秩大臣厄爾維音圖倫楚擒原任貝勒納奇木海  
蘭察擒巴雅爾烏爾登擒尼瑪扎那噶爾布已病死台  
吉琿齊達及其首來獻惟阿逆尙未獲夏六月兆惠  
富德等又窮追至哈薩克阿布賚誓擒以獻適阿逆率



二十人往投阿布資約以詰朝相見先使人收其馬阿  
逆驚又逃阿布資執其兄達什策凌送軍門阿逆徒步  
入俄羅斯爲樵者所得守卡之瑪玉爾送往其國察罕  
汗我侍衛順德訥尋蹤往瑪玉爾誘爲不知  
上命理藩院行文俄羅斯索之阿逆患痘死俄羅斯以  
其屍送久邊

上命素識阿逆之林丕多爾濟往驗屍屬實於是阿逆  
之局始結

上命兆惠富德擇地過冬明年再盡勦厄魯特之漏網  
者二十三年春兆惠由博羅布爾噶蘇富德由賽里木

如獵場中分兩翼合圍約相會於伊犁凡山陬水涯可  
漁獵資生之地悉搜剔不遺時厄魯特懼我兵威雖一  
部有數十百戶莫敢抗者呼其壯丁出以次斬戮寂無  
一聲駢首就死婦孺悉驅入內地賞軍多死於途於是  
厄魯特種類盡矣計自準夷內亂以來惟杜爾伯特策  
楞內附始終無異志所部得保全至今無恙其次則達  
什達瓦之妻當阿逆初叛正伊犁俶擾之時獨率所部  
聞關來投

上憫其誠使居於巴里坤後徙熱河編其人爲兵俾資  
餉以給若沙克都爾曼集不從亂全部內移依巴里坤



近地以居宜得免矣值巴雅爾等之叛

上諭巴里坤大臣雅爾哈善密察之如可信則坦懷以待勿使疑否則先發制人毋令為肘腋患初非必欲殺之也雅爾哈善不敢保遂令裨將丑達乘夜雪襲殺其全部四千餘人傳聞沙克都爾曼集被殺時殘燈未滅其妻睡夢中驚起不忍其夫之戕於亂刃裸而抱持之如兩白蛇宛轉穹廬中以至於死也其他諸賊既降復叛自取誅滅草薙禽獮無噍類固無論已此固厄魯特之一大劫凡痘死者十之五進入俄羅斯哈薩克者十之三為我兵所殺者十之二數千里之內遂無一人蓋

天欲盡除之空其地為我 朝耕牧之所故生一阿逆以為禍端輾轉以迄於漸滅也而兆惠等軍行所過旁近之國東部哈薩克阿布賚既投誠西部哈薩克霍集伯爾根及喀喇巴賴亦納款右布魯特酋長瑪木特呼里比左布魯特酋長喀喇博託亦皆聞風景附先後遣使奉表入覲

聖天子德威所被極於無外矣是年又有回部之役大和卓木波羅尼都小和卓木霍集占者其先世本葉爾羌喀什噶爾回酋自策妄阿拉布坦時即令率其回人至伊犁種地出租賦我兵平伊犁時釋使歸俾仍長所





部二十一年將軍遣侍衛託倫泰往定貢賦久之未回  
兆惠又奏遣副都統阿敏道往未至而託倫泰回仍未  
定要約阿敏道先使人往招撫波羅泥都謂霍集占曰  
我家三世爲準夷所拘蒙天朝釋歸得統所部此恩  
何可忘也霍集占曰吾方久困於準夷今屬中國則又  
爲人奴不如自長一方乃詭詞誑阿敏道入庫車城拘  
繫之弗使歸時方討阿逆兼有青滾雜卜之變未暇問  
及也已而聞阿敏道爲霍集占所害是其負恩肆逆不  
可不討二十三年春以兆惠富德尙勦洗厄魯特餘孽  
乃用雅爾哈善爲靖逆將軍五月兵至庫車賊目阿卜

都克勒木據城守於是虜兵進攻六月十六日霍集占  
來救爲我兵所敗霍集占卽以是時潛入城雅爾哈善  
欲誘其出擒之乃撤西門之圍令順德訥駐近地以伺  
之二十四日夜半霍集占果率其黨遁順德訥不知及  
明追之已不及而城中猶拒守提督馬得勝令兵掘地  
道以入將及城爲賊所覺橫截一溝實薪焚之我掘地  
兵多有死者

上以雅爾哈善坐守軍營聽賊去來自如畧不設備乃  
革其職命尙書納木扎爾代之侍郎三泰參贊軍事皆  
馳驛往又以兆惠勦厄魯特將盡命卽以其兵自伊犁



徑赴回地并諭所以處雅爾哈善及順德訥者  
上復念兆惠兵久勞於外皆已疲乃預調索倫察哈爾  
兵往濟師兆惠至回地而庫車已降於雅爾哈善阿克  
蘇城回人亦遣人迎雅爾哈善軍八月二十四日兆惠  
遇雅爾哈善於阿克蘇城外明日偕入城傳旨斬順  
德訥逮雅爾哈善送京擇城中伯克鄂對隨軍而留哈  
密回目玉素富及總兵門相師率兵駐守時舒赫德方  
爲兵效力軍前亦令留阿克蘇贊畫諸務兆惠卽起行  
有烏什城伯克霍集斯卽前歲縛獻達瓦齊者遣其子  
呼岱巴爾氏來迎九月朔兆惠至烏什以霍集斯熟回

事與同進葉爾羌分遣侍衛齊凌扎卜偕鄂對往撫和  
闐六城十月兆惠軍至葉爾羌其城周十餘里霍集占  
已堅壁清野凡村莊人戶悉移入初六日我軍分七隊  
進賊兩門各出四五百騎來迎我兵擊敗之賊又從北  
門出數百騎策應我兵又敗之賊入城不復出兆惠以  
兵少不能圍城欲伺便取勝乃擇有水草處結營卽所  
謂黑水營也聞納木扎爾三泰將至遣愛隆阿以兵八  
百迎之又偵知賊牲畜在城南棋盤山欲先取之以充  
軍實十三日由城南奪橋過河南過四百餘兵橋忽斷  
賊出四五千騎來截步賊萬餘在後我兵陣而前騎賊



退步賊以烏槍進我兵方擊步賊而騎賊又從後夾攻兼有白兩翼衝入者兆惠馬中槍斃再易馬又斃我兵爲賊所截散落數處人皆自爲戰無不以死誓殺賊無算而我兵陣亡者亦百餘得傷者數百總兵高天喜副都統三保侍衛鄂實特通額俱戰歿日暮收兵歸護大營過河者亦泗水歸因馬力久疲不能衝殺遂掘濠結寨守賊萬衆來攻我兵接戰五晝夜皆勝賊不復敢犯築長圍以相持納木扎爾三泰亦以十三日至愛隆阿軍聞兆惠等戰率二百騎衝入爲賊所殺兆惠告急之文遣索倫兵五人各持一函至阿克蘇舒赫德以事

急不暇自計其身之爲兵也卽飛章馳奏時富德尙在準噶爾搜餘孽

上命爲定邊右副將軍速往援會預調之索倫察哈爾兵已枉途而巴里坤大臣阿里衮先接兆惠檄取馬駝卽選兵六百馬二千駝一千往赴舒赫德守阿克蘇能和輯諸回目無異志烏什則霍集斯妻子及丑達駐守齊凌扎卜與鄂對往撫和闐六城亦俱降十二月索倫察哈爾及內地兵已到二千餘舒赫德先率以行富德聞兆惠被圍之信亦速赴二十五日與舒赫德會於巴爾楚克二十三年正月六日至呼爾璦賊五千餘騎迎



戰我兵僅二三千且馬少皆步行發槍矢斃賊甚多然  
賊恃其衆戰不解我兵進擊輒退甫收兵又來攻凡轉  
戰四日夜積地無水皆嚼冰以止渴初九日之夜拒守  
於沁達勒勢阻不得進又幾殆適阿里衮偕鄂博什率  
兵及馬駝至愛隆阿亦以兵從望見燈火如繁星知我  
兵與賊相持處也阿里衮大呼突進千餘兵譟而應之  
駝一千馬二千蹴踏聲又壯賊駭奪氣阿里衮愛隆阿  
從左入鄂博什從右入援兵驟合富德兵乘勢掩殺賊  
始大奔然猶未知兆惠等存歿也先數日兆惠見賊之  
圍守者日漸少繼又聞數十里外槍礮聲知援兵已至

遂衝壘而出先使人探報得達富德軍詰朝兩軍相見  
將軍以下皆無恙計自去年十月至今孤軍在萬里外  
陷重圍者三月卒得全莫不喜極涕出額手頌  
聖主如天之福且因先事調兵得應期赴援益服  
睿算之不可及也整隊回阿克蘇賊見我兩路兵合勢  
益盛不復敢邀截惟遠在數十里外覘望而已途次聞  
和闐六城其二城已陷於賊兆惠遣瑚爾起往援之富  
德繼進二城尋復聞六月內地所調兵餉俱集阿克蘇  
遂兩路進師兆惠往喀什噶爾富德即由和闐往葉爾  
羌兩和卓木已率其眷屬黨與先遁兩城舊回目遣人



至軍前送款十四日兆惠至喀什噶爾十八日富德至葉爾羌各回人皆具鼓吹進羊酒迎以入蓋兩酋雖爲其部長然枉準噶爾人惟伊犁種地之回人同羈旅相倚賴而營部本不聯屬及歸又虐用其民以伊犁同歸之人及厄魯特避難來投者爲親兵故其竄也皆相率隨之舊部人莫有從者兆惠旣撫定喀什噶爾尋駐葉爾羌辦善後事富德阿里衮明瑞阿桂等追賊七月七日及之於阿爾楚爾大敗之二十五日及之於哈喇庫勒又大敗之八月十日至伊西洱庫爾淖兒乃拔達克山部接界處也賊先據山麓以待富德等麾兵進擊自

已至未賊猶以死拒乃選烏槍精利者四十人自山北而上俯壓之賊輜重有攀援過山者有阻於淖兒岸者方驚懼失措霍集斯鄂對大呼降者不殺於是回衆數千各率其眷屬乞降聲如奔雷霍集占禁之不能止遂遁是役也降者萬二千牲畜萬計器械無算兩酋向拔達克山逸去富德等追入檄諭其汗素爾坦沙縛以獻二十八日兩酋果往投素爾坦沙執之而遣人爲兩酋乞命謂我回部經教凡派罕帖爾子孫不得執送人也富德等脅以兵威謂不獻則大兵卽入素爾坦沙乃殺兩酋以霍集占首來獻其波羅泥都首爲其從人竊去



素爾坦沙旋來降遣使入覲回部平武功大定 頒詔  
天下封兆惠一等公富德一等侯餘遷秩有差自此偃  
甲息戈疆以周索而屯田之議起巴里坤外由木壘而  
烏魯木齊而伊犁以次墾闢屯田兵不下萬人移安西  
提督於烏魯木齊統轄之伊犁築大城設將軍總理準  
噶爾地及回部事又選滿洲兵三千孛家往駐室處而  
兼游牧之長地沃衍種輒倍收台官兵屯田外餘地聽  
人自占內地之民爭趨之村落連屬煙火相望巷陌閒  
羊馬成羣皮角氈褐之所出商賈輻輳甚至紹興之酒  
崑腔之戲莫不至至地大物賚道府州縣官理訟獄

均賦役一如內地較漢之戊己較尉唐之四鎮北庭不  
啻倍蓰過之蓋自有天地以來 埃南北之地未有如今  
日景象也其回部即漢西域三十六國及唐回紇之地  
前代祇通貢使今亦設官定賦疎節闕目順其俗而撫  
治之設爐於葉爾羌鑄乾隆錢以便民用和闐之玉歲  
貢天府其地向無豚豕今商販流通市有肥穡他可類  
推也統計自伊犁至回部幅員幾及二萬里累朝所不  
能臣服者待我

皇上廓清蕩定始成中外一統之治非夫智勇天錫明  
足以燭幾謀足以制勝威令足以驅策羣力豈能拓此



無外之鴻模也哉

臣 既摘敘平三逆平朔漠方畧我

聖祖安內攘外之功度越千古人皆得而見矣然自策  
妄阿拉布坦漸強繼以噶爾丹策零世濟其惡  
我西北兩路又常駐重兵備堵勦迨額爾德尼  
招之捷敵始乞和我

皇上御極與之定邊界并許其通市易乃寢兵不用  
然聘使往來猶用鈞禮未得臣服之也乾隆二  
十年以後用兵戡定乃不惟臣服之且盡掃除  
之由今日事後觀之固其曉然於天意欲盡滅

準夷就其地別開一中華世界而當用兵之始  
固莫測天意果何如也惟

皇上見事機可乘遂舉全力以應之事機可乘即天  
也可乘而即乘之即易所謂先天弗違後天而  
奉是以成功若此之易也然是時我

皇上敬事慎謀正未嘗稍有易視之意每軍報至應  
機指示必揭要領或數百言數十言軍機大臣  
承 旨出授司員屬草率至腕脫或軍報到以  
夜分則預飭內監雖 寢必奏迨軍機大臣得  
信入直廬



上已披衣覽畢召聆旨矣撰擬繕寫動至一二十刻  
上猶炳燭待閱不稍假寐或一二日無軍報則延望  
不釋蓋五年中如一日也軍郵萬餘里文報往  
返動需月餘故凡數月後應辦之事皆預籌及  
之聞阿逆有異志卽馳諭軍營遮獲其妻子使  
不得遁迨阿逆遣人至已遲半日矣兆惠之赴  
回部也賴

上預調兵在途故黑水營之圍得及時赴援不然則  
事未可知也此特舉一二端其他可類推矣領  
兵者奏事大率藏短露長

上卽其所奏勇怯勤惰洞見肺腑分別功過信賞必  
罰有罪則親貴如色布騰巴爾珠爾黜革不少  
貸有功則疏賤如高天喜由守備不半載擢至  
總兵是以人人效命有進無退成此大功嘗觀  
士庶之家其主者凡家事早作夜思不自暇逸  
未有不大大其門戶寢昌以熾況

聖天子以聰明天亶之資順天心仗國力本健行無  
息之精神運旁燭無遺之籌畧事半功倍固早  
在燭照數計中而非恃天幸以集事也然則功  
不虛立事不幸成有如是之



神聖乃有如是之功勲歷觀史冊漢唐以來何代可  
以比隆也哉臣昔直軍機處正當平定準夷回  
部之時睹記最爲親切茲撮敘方畧益得印証  
故所記較詳贍庶不徒鋪述粗迹云

上質資育也頃頤頤收高天喜由中甫不余薄繼至  
置齊罪傾賤貴收可平繼巴爾莊爾無革不不  
上唱其汎奏更封謹部所貝汎汎分限江歐計賞必

藝海珠塵

南匯 吳 省蘭 泉之輯  
婁縣 潘 鏞 洪聲校

皇朝武功紀盛三

趙 翼纂

平定緬甸述畧

緬甸古朱波地宋寧宗時始通中國元世祖遣兵三征  
之責其貢賦而還明初設宣慰司嘉靖萬歷間有莽瑞  
體者漸強盛傳及其子莽應裏世爲邊患參將鄧子龍  
遊擊劉綎各率兵五千入平之而其雄長於南徼如故





明初所設邊外三宣六慰諸土司大抵皆服屬於緬矣  
殘明僞永明王由榔竄其國緬酋莽應時陽款而陰拘  
之李定國率兵入欲護王以出莽應時弗與定國肆焚  
劫莽應時密遣使乞援於我朝約大兵至卽俘永明  
以獻時吳三桂以親王鎮雲南偕將軍愛星阿率兵萬  
餘入莽應時送永明於軍時順治十八年也是時三桂  
未及爲善後計邊外木邦猛密大山諸土司聽其仍爲  
緬屬不復能如明初之衆建而分其勢由是緬甸竟國  
於西南乾隆十九年緬酋莽達喇與得楞錫箔諸夷構  
兵爲所殺緬國無主有緬屬木梳土司囊藉牙起兵聲

言爲故主復讐擊敗得楞諸夷遂自竊據緬酋位初在  
其木梳築城繼乃徙於故緬酋所居之阿瓦城凡緬國  
舊所屬土司皆降服之有不服者輒治兵攻擊無虛日  
貴家者隨永明入緬之官族也其子孫淪於緬自相署  
曰貴家據波竜廠採銀向有歲幣輸緬囊藉牙僭位後  
貴家不復輸囊藉牙擊潰之貴酋宮裏雁猶糾合餘衆  
以拒此乾隆二十三年事也而木邦土司罕莽底亦不  
甘爲囊藉牙屬遂與宮裏雁合兵囊藉牙又遣其土目  
落覺攻破之罕莽底遁於孟坑二十五年囊藉牙死其  
子莽紀覺嗣構兵如故二十七年宮裏雁亦避於孟坑



而我孟連土司刀派春者素嗜利聞宮裏雁之竄於近邊也遣人招之宮裏雁疑未決而其妻囊占先率衆來附刀派春勒索其貲財婦女殆盡囊占怒襲殺刀派春而去宮裏雁不知也而永昌守楊重毅誘致之至則坐以擾邊罪肆諸市於是緬酋益無所忌浸尋而及我耿馬土司矣耿馬雖我土司而於緬亦舊有歲幣至是莽紀覺遣其目普拉布率兵二千來索先闌入我孟定執土司罕大興使爲鄉導入耿馬土司罕國楷邀之於滾弄江擊斬普拉布餘賊遁去二十八年冬緬賊復至我遮放邊外揚言來索木邦官會罕莽底病死賊乃退三

十年莽紀覺死其弟懽駁嗣卽今緬酋也三十一年賊復索幣於我孟連土司相傳孟連之先本緬支子有緬酋所賜象及金刀爲重器每替襲必封上舊所賜而更請新者至是刀派先嗣緬酋遣人來索舊物揚言有衆六千已至臘戍又千餘人各帶船釘十枚將造舟渡滾弄江訛言流聞邊民一日數徙此永昌邊外之擾也益我諸土司之近緬者往時皆於緬私有年例自木梳據位號諸土司以其故等夷不復予而木梳方與貴家諸夷相攻未暇遠問及貴家木邦相繼爲所并乃漸及我土司此起衅之由督撫大吏倘以此情入奏





藝海珠塵 三  
上自有裁度其時普洱邊外雖有匪徒倣擾而永昌邊外或不必用兵也普洱之役自乾隆三十年始車里土司忽有賊百餘突入爲土目刀銑等敗去其冬又有賊數千掠九龍江小猛崙諸處初不知爲何賊也督臣劉藻親往勘亦莫得要領傳聞孟良土司之族人召散者糾緬賊爲助纂據孟良導賊擾邊於是遣總兵劉得成參將劉明智等分路堵截而參將何瓊詔失律敗歸三十一年春劉藻自刎死大學士楊應琚來滇辦賊會賊漸退得以其閒平整欠以土目以先捧守之又平孟良以土目召岡守之部署粗定而永昌邊外適有緬賊徵

索孟連之事撫臣常鈞奏請普洱事畢後當卽辦永昌邊外賊

上是之於是楊應琚移駐永昌而僚屬之喜事者輒爭言緬甸可取狀楊應琚初弗聽曰吾官至一品年逾七十復何求而以貪功開邊釁乎有副將趙宏榜者少爲波竜廠丁頗悉緬事曰願假某兵數百可生縛緬酋於麾下矣騰越州知州陳廷獻曰并不煩官兵某已集土練四千以待矣楊應琚遂心動欣然許之於是趙宏榜率兵二百襲蠻暮之新街一鼓克之以蠻暮土司瑞團來降陳廷獻遣人招猛密土司不聽則誘致其所屬之



猛斂土目線官猛來降而本邦故土司罕莽底之弟線  
襲團及其子線五格猶在孟坑緬寧通守富森亦招之  
降降者皆曰我地若干人戶若干願內附歲輸糧若干  
楊應琚遽以拓地千里人戶數十萬歲輸糧數萬石入  
奏而其地其人其糧則固尚在邊外我初未嘗得而有  
之也新街者南太金江水口緬人與中國市易處順流  
而下六日可至阿瓦爲賊最要地賊聞其入於我也率  
數萬衆來爭趙宏榜出拒之恃勇不設備全軍皆覆於  
是新街失守賊尾而入直薄隴川之虎踞關提督李時  
升檄諸將禦之戰於楞木戰於嶺岡寨互有勝負輒以

大捷奏賊復分兵繞人萬勿關掠盩達越隴川而出會  
賊遣人議和約各退兵毋相犯諸將許諾賊渡猛卯江  
去李時升復趣諸將哈國興等追之被圍於猛卯城救  
至圍始解先是楊應琚見賊勢大知事未易就乃以得  
不償失奏請棄新附諸土司地有 旨切責至是楊應  
琚以爲賊已遁也檄總兵朱崙等進據木邦木邦空無  
人野無所掠自宛頂運糧以給天漸暑瘴癘方興人多  
病將軍楊寧後至甫數日而賊大集我師遂潰而歸木  
邦失守時三十二年四月十八日也楊應琚及李時升  
等皆獲罪





上命明瑞以將軍兼總督給滿洲兵三千調川貴及滇兵二萬餘大舉勦賊至則簡軍實練士卒議分兩路進明瑞由錫箔路參贊大臣額爾登額由猛密路約相會於阿瓦以九月二十四日出師會大雨三晝夜不絕人馬俱立泥潦中糗糧盡溼至芒市易糧以行而負糧以牛不能速十一月二日始出宛頂越八日整隊入木邦軍容甚盛留參贊珠魯訥守之給以兵五千俾爲聲援明瑞自率萬二千人抵錫箔江結浮橋以渡至蒲卡始遇賊之前哨擒數人詢知賊聚於蠻結遂進蠻結賊果立十六柵以待領隊大臣觀音保麾衆先據山之左營

賊來爭不得上翼日兩軍相持未決而顧賊柵甚堅其法立木爲柵聚兵於其中我槍礮僅及其柵而賊從柵隙處發鳥槍擊我兵輒中此賊之長技也哈國興請分三路登山俯趨而薄之軍士皆奮時出邊已逾月未見賊至是始與賊遇無人不欲殺賊也一呼而直逼其柵有黔兵王連者先躍入十餘人繼之賊恇亂不知所爲多被殺遂破一柵乘勢復攻得其三而十二柵之賊乘夜盡遁蓋賊自新街交兵以來從未經此大創已首鼠喙伏不敢復抗矣會明瑞一月中傷幾殞越數日始稍愈乃復進兵至象孔迷失道而軍中糧已匱集諸將議



進止諸將莫有敢言退者明瑞念糧旣斷勢不能復進  
而又慮猛密路之師或已先入而將軍轉退兵則法當  
死聞猛籠有糧且其地近猛密冀可得猛密路聲息於  
是定計就糧猛籠賊探我兵不復向阿瓦又我病兵有  
被掠者詢知軍糧盡乃糾衆來追及我於章子壩自是  
無日不戰明瑞及觀音保哈國興更番殿後至猛籠果  
多糧軍士賴以濟會歲暮卽其地度歲而猛密之信杳  
如三十三年春乃取道大山土司以歸猛籠糧尙多而  
牛馬俱盡無可馱運人各攜數升餘皆火之將至大山  
又有蠻化之捷先是賊之綴我也每夕駐營猶相距十

餘里不敢逼至是我兵營於蠻化山巔而賊卽營於山  
半明瑞謂諸將曰賊輕我甚矣若不決一死戰益將肆  
毒於我無噍類也賊久識我軍號每晨與我三吹波倫  
而起行賊亦起而追我明日仍吹波倫者二而我兵盡  
伏於箐以待毋得有一人留營者令旣下翼日三波倫  
畢賊果謂我兵已行也爭蟻附而土我兵萬衆突出槍  
礮聲如雷賊惶遽不及戰輒反走趾及頂背自相蹴踏  
死者無慮二千餘人我兵乘勢擊殺又一二千坡澗皆  
滿自是賊不敢近數日每夜拄數十里外轟大礮數聲  
而已而賊之先一日過者已柵於要路明瑞留蠻化五



日以所得牛馬分犒軍士畢行至其處則已攻不能拔  
有波竜人引以閒道始得出過波竜老厰新厰貴家所  
採銀處民居遺址徑數里計當日厰丁不下數萬已俱  
爲賊衝散盡愀然者久之而賊復增兵追至賊之分路  
襲木邦者正月十八日已潰我木邦之師珠魯訥自到  
死參軍楊重英被執於是木邦之賊亦至額爾登額之  
進猛密也道聞老官屯有賊欲先取之旣至而攻柵不  
克頓兵者數月

上以明瑞久絕軍報趣額爾登額援之於是老官屯之  
師撤而老官屯之賊亦至明瑞行抵小猛育賊已蝟集

不下四五萬人我兵尙分七營而環視四圍皆賊也而  
額爾登額之援不至明瑞遣卒探路曰路旁已有賊柵  
矣乃令諸將達興阿本進忠等率軍士乘夜出而身自  
拒賊相從者領隊大臣觀音保札拉豐阿總兵哈國興  
常青德福及巴圖魯侍衛數十人親兵數百人及晨血  
戰於萬賊中無不一當百已而札拉豐阿以槍死巴圖  
魯侍衛皆散觀音保發數矢連殲賊尙餘一矢欲復射  
忽收而策馬向草深處以其鏃刺喉死恐矢盡無以自  
戕而被執也明瑞身負數傷亦慮落賊手力疾行距戰  
處已二十里氣僅屬乃從容下馬手自割辮髮授家人



使歸報而縊於樹下家人以木葉掩其屍而去二月之十日也計自章子壩與賊相接賊日增我兵日少孤軍無援轉戰五六十日未嘗一敗明瑞每晨起即躬自督戰且戰且撤及歸營率以昏時勺水猶未入口糧久絕僅啖牛炙一瓣猶與親隨之戰士其之所將皆饑疲創殘之餘明瑞體恤備至有傷病者令士練舁以行不忍棄故雖極困憊無一人有怨志其死也非不能自拔歸蓋以阿瓦未平懼無以返命

上亦有全師速出之旨而路阻不得達遙望闕廷進退維谷故徬徨展轉決計以身殉而又不忍將士之

相隨死也結隊徐行持重自固使賊不能覆我直至小猛育距宛頂不過二百里度將士皆可到然後遣之出而自以身死賊中嗚呼此意良可悲已方軍勢日蹙時鬪愈力嘗謂諸將曰賊已知我力竭然必決死戰者正欲賊知我國家威令嚴明將士用命雖窮蹙至此無一人不盡力則賊知所畏而後來者易於接辦此其謀國之深尤非徒慷慨赴死者所可同日語矣然明瑞之死緬人不知也而餘威猶震四月中緬酋遣我兵之被俘者許爾功等八人齎貝葉書求和副將軍果毅公阿里衮奏其事




上慮賊非出於至誠不可輕許戒勿蒼冬阿里衮駐兵於邊

上命雕勦以怵之於是遣侍衛達里善等搗南坎殺二百餘人海蘭察等搗頓拐亦殺二百餘人會副將軍阿桂亦至營兩將軍合將八百人龔戛鳩殺六七百人三十四年春

上命大學士公傅恒來滇經畧兵事以四月朔至永昌越八日至騰越州兩阿將軍及將軍伊勒圖偕至南徼地多瘴羣議宜俟霜降後出師經畧遲之謂若是須坐守四五月既糜餉且軍初到當及其銳用之久則先懈

非計也其進兵之路以阿瓦城在大金江之西若從錫箔路進則阿瓦仍隔江外惟騰越州西有戛鳩江即大金江之上流過江則為猛拱猛養兩土司前明王驥征麓川追思機發至此刻石江邊所謂石爛江枯爾乃得渡者也由猛拱猛養可搗緬酋之木疏老巢由木疏至阿瓦又皆陸行步騎可直抵城下乃定議大兵渡戛鳩而西其偏師先議在普洱遙為聲勢後改議從猛密路夾江而下造舟於蠻暮以通往來部署既定七月二十日經畧大兵起行阿里衮從留阿桂於蠻暮督造戰艦經畧至戛鳩集舟結筏凡十日乃畢渡師次猛拱土官





渾覺先遁繫其小妻招之乃來降獻馴象四貝葉書一  
夷語謂之標格丁牛百頭糧數百石至猛養亦有牛米  
蓋編年紀侯之書之獻於是所歷二千餘里皆不血刃而下惟途間忽雨  
忽晴山高泥滑一馬倒則所負糧帳盡失軍士或枵腹  
露宿於上淋下潦中以是多疾病猛拱猛養雖緬屬非  
緬腹地故緬酋不遣兵來而緬俗以八月前刈禾至中  
秋則集兵出九月下旬阿桂造百船成所調閩粵習流  
之士亦至將由蠻暮江出大金江賊已列舟扼江口阿  
桂擊敗之賊目賓雅得諾被創死由是江路無阻伊勒  
圖往迎經畧遇於哈坎經畧以十月朔渡江回蠻暮緬

賊等以大衆水陸來犯阿桂將步兵哈國興將水兵陸  
路之賊先沸脣至旌旗蔽野勢張甚阿桂磨兵以烏槍  
連環疊進弓矢繼之騎兵又從旁蹂之賊不支遂大潰  
我兵追殺無算哈國興率舟師順流下賊猶列艦以拒  
有閩兵躍入賊船一賊泅水道閩兵卽入水斬之賊駭  
奪氣我軍譟而奮因風水之勢蹴之賊舟自相撞擊多  
覆凡殺溺死者數千江水爲之赤江之西亦有賊結柵  
自固阿里衮提兵往攻連破二柵餘賊皆逃是時諸路  
軍皆大捷會經畧已病諸將欲遂以此蕘事阿里衮曰  
老官屯有賊柵前歲額爾登額進攻處也距此僅一舍



不往破之何以報命策馬先行經畧以下皆隨之賊柵  
據大坡週二里許自坡迤邐下插於江柵木皆徑尺埋  
土甚深遇樹則橫貫之以爲柱柵之外掘深濠三層濠  
外又橫臥木之多枝者銳其末而外向名曰木簃守禦  
甚備我軍阻旬餘不得進先用大礮擊之柵木堅不折  
有折者賊輒補之哈國興斫箐中老藤長數百丈者繫  
鐵鈎於端募敢死士夜往鈎其柵三千人曳藤以裂之  
爲賊覺砍藤斷而罷經畧又命火攻先製礮牌禦槍礮  
一牌可護十數人以兩人舁而前十數人各挾薪一束  
隨之百餘牌同時並舉如牆而進拔箐越濠至柵下方

燃火忽西南風起火反燒我軍遂卻回最後遣兵穴地  
至其柵底實火藥轟之柵果突然起高丈餘賊驚擾喊  
聲震天我軍皆挺槍抽刀待柵破而掩殺無何柵忽落  
而平又起又落如是者三不復動柵如故蓋立柵之坡  
斜而下而地道乃平進故坡土厚不能迸裂也然賊自  
是懼其柵之插入江者開水門以通舟運糧械不絕阿  
桂謂如是則賊終無坐困之日也撥戰櫂五十越過其  
柵截之時阿里衮已病甚猶力疾督攻柵視槍礮最多  
處輒當之經畧慮其傷令統舟師以息勞戰艦整列賊  
糧械不得入柵由是益懼其酋帥曰眇匪模者遣人來



乞和願結棚於兩軍適中地請將軍等往莅眇旺模親  
來面受要約經畧不許諸將以兵多染瘴日有死亾爭  
勸受降撤兵乃遣哈國興往責眇旺模以進表納貢返  
土司地諸事議未決眇旺模左顧而去哈國興單騎入  
其棚責之眇旺模不敢見別遣人出請如約適緬酋情  
駁亦遣使齎貝葉書來乞降乃取其成而還緬甸平

余以乾隆三十三年奉 旨赴滇時果毅阿公爲  
將軍命余參軍事嘗從歷八關諸隘口是冬雲巖  
阿公以總督兼將軍二公同在一營余兼直焉其  
明年大學士忠勇公傅文忠來滇經畧余以故吏

又在幕下故所記較親切其於明將軍之事獨詳  
者余至滇時距將軍之殉節僅數月滇民及從征  
之軍士言及將軍無不墮淚者其得人心雖古名  
將不能過也卽以戰功論準夷回部之役正賊人  
敗亂時我兵所向披靡莫敢抗其旅拒者僅齊爾  
噶朗葉爾羌黑水營等十數戰耳非日有相殺之  
事也惟緬賊自章子壩與我兵相接後無日不襲  
我於歸途我兵之撤回必先以一軍迎戰然後以  
一軍退退至數里又列以待而使先戰之軍撤回  
列以待者又出戰如是者更番迭代日凡數十次



故每日僅行二三十里自章子壩至小猛育二千  
里之地六十餘日始至賊隨處可調兵而我無後  
繼賊隨地可取糧而我無續運賊以一象馱一礮  
所至可轟擊而我軍械火具日少一日當戰苦時  
槍礮聲如數百萬爆竹同時迸裂對面不聞人語  
也然六十餘日中未嘗一敗其間又有蠻化之大  
捷賊死者三四千歷觀史冊如將軍之深入重地  
全師而出者有幾人哉惜將軍已歿諸戰功遂不  
及見之奏牘天下人無由知余問之從征者既得  
其詳恐日久無復能記憶也故不憚縷述云終

藝海珠塵

南匯 吳 省蘭 泉之輯  
婁縣 潘 鑑 虛堂校

皇朝武功紀盛

趙 翼纂

平定兩金川述畧

金川爲漢冉駝外徼隋置金川縣唐屬維州至明隸雜  
谷安撫司其地高峯插天層巒迴複中有大河用皮船  
窄橋通往來山深氣寒多雨雪所種惟青稞蕎麥其番  
民皆築石碉以居與綽斯甲布等九土司壤相錯九土司曰





總斯甲布曰革布什咱曰巴旺曰布拉克底曰康熙五  
丹壩曰鄂克什曰工噶克曰梭磨曰卓克采  
年其土司嘉勒塔爾巴內附給演化禪師印俾領其衆  
後嘉勒塔爾巴之庶孫莎羅奔以土舍率兵從將軍岳  
鍾琪征羊崗有功雍正元年授爲安撫司莎羅奔既得  
官號自稱大金川以舊土司澤旺爲小金川於是有大  
小兩金川之稱莎羅奔尋以女阿扣妻澤旺澤旺懦爲  
妻所制乾隆十一年莎羅奔劫澤旺歸奪其印總督慶  
復檄諭始還澤旺於故地十一年又攻革布什咱及明  
正土司巡撫紀山遣副將張興率兵彈治不奉約反傷  
我官兵紀山奏請進剿

上以黔督張廣泗征苗有功嫺軍務調川督用兵至則  
進駐澤旺所居之美諾官寨而以其弟良爾吉從征時  
莎羅奔居勒烏圍舊名勒歪其兒子郎卡居噶拉衣舊名利耳崖  
地皆在大河之東而河西亦有賊地數百里張廣泗奏  
調兵三萬分兩路由黔西入者攻其河東山川南入者  
攻其河西而河東又分四路以兩路攻勒烏圍兩路攻  
噶拉依其河西亦分三路攻庚特額諸山期以是年告  
歲已而阻險不得進十三年春諸將多失事張興駐馬  
邦爲降番所誘被戕噶固土兵從征與賊通遊擊孟臣  
戰死乃命大學士公訥親往視師又起故將軍岳鍾





善海珠塵  
琪於廢籍以提督銜赴軍自效岳鍾琪由丹壩取勒烏  
圍張廣泗由昔嶺取噶拉依議既定而訥親至銳意滅  
賊急催戰總兵任舉參將買國良皆戰死自是不敢主  
謀仍倚張廣泗辦賊張廣泗輕訥親不知兵而事權出  
已上陽奉而陰伎之將相不和諸將遂無所稟承率觀  
望不盡力軍士皆解體張廣泗所用良爾吉者本與阿  
扣通莎羅奔遂令與阿扣爲夫婦其繫澤旺奪印信皆  
良爾吉所唆也既在軍則爲莎羅奔耳目軍中動息賊  
輒知得早爲備而張廣泗待之不疑岳鍾琪密奏之是  
年自五月進兵至八月未得寸進方攻喇底山十數賊

噪而下我二千兵皆潰

上以訥親張廣泗各持私見致債事皆罷斥之 命大  
學士傅恒往經畧至則斬良爾吉阿扣以斷賊內應增  
調鄰省兵刻期進勦軍聲大振莎羅奔郎卡懼懇於岳  
鍾琪代乞命傅恒奏之

上命受其降莎羅奔郎卡至軍前泥首請罪遂罷兵俾  
仍爲土司葢叛則討之服則舍之固我

皇上威德應用之大度也無何郎卡主土司事不數年  
漸狂悖二十三年遂革布什咱土官及澤旺之子僧格  
桑於吉地總督開泰檄九土司環攻之久而漸懈郎卡



侵鄰境不已三十一年總督阿爾泰往責諭始返諸土  
司侵地未幾轉以文妻僧格桑兩金川由是狼狽爲奸  
矣澤旺老且病事皆歸僧格桑已而郎卡死其子索諾  
木益凶狡與僧格桑相勾結三十五年僧格桑侵鄂克  
什據其地阿爾泰又往責始還之三十六年索諾木計  
殺革布什咱土官并擄其妻僧格桑再攻鄂克什侵及  
明正土司阿爾泰遣兵護鄂克什僧格桑遂與官兵戰  
事聞

上以前此出師本以救小金川今小金川反肆逆罪不  
可赦乃命大學士溫福赴蜀尙書桂林代阿爾泰爲

總督共討賊溫福由汶川出爲西路桂林由打箭爐出  
爲南路二十七年春桂林克卡了復革布什咱故地溫  
福克資哩及阿喀水雅五月桂林遣將薛琮等裹五日  
糧入墨壟溝賊截其後路不得出將卒三千餘皆歿泗  
水脫歸者僅二百餘人桂林匿不奏爲阿爾泰所劾乃  
罷桂林先是故將軍阿桂以緬事罷官在溫福軍從征  
尋授提督至是

上卽軍中擢爲參贊大臣赴南路代桂林進勦十一月  
克翁古爾壘及僧格宗乘勢直入十二月遂克美諾官  
寨溫福亦克路頂宗明郭宗至美諾相會僧格桑先送



其妻妾於金川自赴澤旺所居之底木達澤旺閉門不  
納僧格桑殺閹人而去由美臥溝竄入金川溫福軍至  
底木達俘澤旺送京

上初意祇以僧格桑叛逆故申討索諾木雖不靖未與  
官兵抗尙無意於并滅之也然已預燭二酋必相黨助  
兵不可中止已命溫福爲定邊將軍阿桂豐昇額爲  
副將軍以備進兵至是僧格桑既竄入金川將軍等檄  
索諾木縛以獻不應而軍前擒獲賊番皆言小金川抗  
拒時金川嘗遣兵來助是其黨惡肆逆更不可不討乃  
命乘勢卽進兵溫福由功噶爾拉入阿桂由當噶爾拉

入豐昇額由綽斯甲入三十八年春溫福以賊扼險不  
得進別取道攻昔嶺駐營於木果木令提督董天弼分  
屯底木達以偵賊六月索諾木陰遣小金川頭人七圖  
安堵爾出美臥溝煽故番之降我者先攻董天弼戕之  
白山後來擾木果木劫礮局斷水道運糧夫爭避入大  
營聲如沸紛且亂營中兵遂潰溫福以親兵百人搏戰  
力不敵被害提督馬全牛天畀亦戰死其餘文武官殉  
難者數十人陣亡兵三千餘人小金川之地復陷於賊  
阿桂聞變知必有降番內應凡僧格宗約咱卡了諸寨  
番悉擊之故一軍獨鎮定然賊勢方橫我孤軍亦難



獨駐乃整隊出駐翁古爾壘

上授爲定西將軍豐昇額明亮爲副將軍調滿洲索倫  
及各省兵赴勦阿桂改赴西路由鄂克什入明亮赴南  
路由瑪爾里入皆以十月中起行豐昇額仍在綽斯甲  
進取宜喜阿桂軍克資里克阿喀木雅克木蘭壩克路  
頂宗克明郭宗凡五晝夜遂直抵美諾復之明亮軍亦  
克得里克日寨克赤爾丹思克得布田兩路兵所向皆  
捷遂盡復小金川地

上以番夷之性但知畏威不知感恩前此寬大受降故  
無所懲轉肆猖獗今不可不大罰之也特慮諸將畏難

或冀索諾木縛酋來獻卽圖撤兵則無以伸國憲靖邊  
徼預飭諸將必以掃穴擒渠爲歲事阿桂力以身任之  
三十九年春阿桂進據谷噶其前有羅博瓦山最險峻  
必先取之始得建瓴勢乃遣諸將海蘭察先繞出其後  
額森特繼之海祿又繼之普爾普攻羅博瓦之前山福  
康安由右成德特成額由左皆乘夜潛進比明賊乘高  
來衝我兵仰攻不退俟賊近射之無不應剋倒最近則  
刀矛短接賊始敗我兵直上據其山海蘭察等亦盡克  
第二三四峯碉寨據之因進營喇穆喇穆會豐昇額攻  
宜喜未下留舒常軍綴賊移兵攻凱立葉又阻險不得



進阿桂令其來併力乃留五岱軍於凱立葉留五福軍於丹壩自率兵至阿桂軍時方攻格魯及地益險莎羅奔等皆聚於此我軍盡力摧陷仍爲所阻六月偵知色湖普有閒道可出其後乃令普爾普成德先攻喇穆喇穆各礮以誘賊海蘭察兵卽直上其第一礮礮亦有積木踐而登四面圍之賊伏礮不敢出我軍開一面使遁而伏兵於兩旁擊殺之遂克色湖普賊退守登古及薩斯甲尺備禦益密惟迤西最高峯有兩大礮踞絕頂其旁坡崖如削度我兵不能度備稍弛七月令諸將分路攻旁近各礮寨數十處賊亦分數十處來拒海蘭察遂

夜率敢死士六百人躡最高峯藏火繩由石壁陡滑處攀而上前人之踵幾及後人之頂以手引手至其礮此明一湧而入賊皆殲焉諸將之分攻各路者勇氣百倍連日夜不息所向無不摧破遂盡得左右數十里礮寨乘勝又克日則了口據之其下直臨遜克爾宗八月克該布達什諾木城九月賊酋力不支會僧格桑已死乃遣人獻其屍及其妾側累并頭人七圖安堵爾等至軍前乞赦其誅阿桂械送京而攻益急遜克爾宗爲賊巢勒烏圍外障賊以死守百計攻之不能入而日爾八當噶之下榮噶博爾之上有默格爾山可進十月大兵奮



藝海珠塵  
力攻克之其危險一如色湖普時遂由默格爾下擊密  
拉噶拉木大寨移營駐其地距勒烏圍僅二十餘里於  
是榮噶爾博及日爾八當噶之賊反在後皆已失其險  
遂攻日爾八當噶下之并克凱立葉穆爾津岡作固山  
等險五福在丹壩望見隘嶺煙燄蔽空知將軍已至此  
也越嶺與阿桂會五岱亦由凱立葉來合軍賊退守康  
薩爾時已十一月矣十二月又克榮噶爾博各寨此三  
十九年阿桂西路軍戰攻所歷也是年明亮南路軍亦  
於正月中攻克馬尼山富德繞出山後與之合馬尼諸  
賊盡潰奎林以皮船渡河至博瞻亦克其木城二遂合

兵攻奪絨布寨駐營二月進攻卡卡角城守木谿以拒  
諸將田藍玉興善休夜循陡崖劣僅容趾比明至山巔  
賊不知我兵所自來但見從石隙中出皆驚潰遂得木  
谿各寨越數日再陟一山忽羣賊突出來犯而火藥不  
燃懼而走我兵揮刀驅殺無算其旁山之賊以礮擊又  
炸我兵氣益奮遂克卡卡角而卡卡角之前地名庚額  
特危峯壁立山脚直下至河惟山半有線路又兩石卡  
扼其旁土人云是金川西南第一要隘賊所死守處也  
是以絨布寨之軍阻於險無路可入明亮乃欲由正地  
進兵使人探路深籌數十里無人恐賊誘我入而截於



後也亦不敢進遂亦欲赴阿桂軍合勦阿桂札止之謂  
仍應由宜喜入以分賊力舒常扛宜喜亦札明亮來會  
攻適綽斯甲布土官請爲鄉導明亮從之宜喜之要隘  
曰達爾圖賊連築七碉以拒明亮令諸將奎林等各攻  
一碉冒雨進皆克之遂移營駐守時阿桂在色湖普遙  
望達爾圖山賊碉盡去但有七營知明亮已據此得勝  
勢也尋又克俄坡格勒古八月克木刻什十月克琅谷  
移營駐之琅谷之前有日旁山其趾下插河流得之卽  
可與阿桂軍隔河通往來顧崖壁陡削僅有斜徑一線  
闊不盈丈至山半又有石包賊據以守乃覓閒道繞出

石包之後出賊不意急攻之盡得日旁碉寨石包之賊  
逃無路悉滾崖落澗以死於是循山麓而下直至河與  
阿桂日爾八當山軍營遂一葦可渡此三十九年明亮  
南路軍戰攻所歷也是冬富德扛絨布亦攻克德木特  
布咱納各寨又克穆當噶爾要隘而阿桂軍攻康薩爾  
賊以距巢益近守益堅故頓兵兩月餘四十年春乃分  
兵三隊拔鹿角越重濠從槍石如雨中先攻第一碉適  
有賊露身出碉外一矢殪之遂一呼而上奪據其碉  
之下有地道通第一碉我軍窺以石急攻第二碉亦克  
凡兩日夜盡得康薩爾各寨賊旣失要隘益抽兵扼於



噶朗噶盡力死守阿桂計河西軍或有可乘之隙乃約  
明亮過河訂期兩路竝進使賊不得抽調禦我會連雨  
數十日四月中旬始霽阿桂攻木思工噶克明亮攻宐  
喜同日進師阿桂先奪木思工噶克盡焚其寨落又攻  
克得式梯上下各礮遂移營於榮噶博爾之第三峯而  
明亮軍攻宐喜不克阿桂遣海蘭察福康安等以兵助  
之偵知甲素僅有賊老弱防守令敖成直入連破十礮  
遂分兵六路盡洗二十里內各番海蘭察復攻得薩克  
薩乃回河東軍而河西茹寨一路十餘里麥田將熟賊  
以死守護明亮先攻瀕河六寨賊皆竄遂克茹寨於是

沙壩山及得楞皆下五月阿桂軍克噶朗噶距勒烏圍  
僅數里遜克爾宗已在我後而賊猶據守阿桂念留此  
賊於後糧路可虞非計也遣豐昇額擊以礮成德等越  
崖礮而上盡得上下各礮豐昇額知賊必遁先整兵以  
俟其走悉掩殺之遜克爾宗既得我軍無後顧憂乃進  
逼勒烏圍賊又守昆色爾喇嘛寺其地拄拉枯喇嘛寺  
之上山益險六月阿桂軍由舍圖枉卡紆道入賊伏於  
巖洞突出犯成德等以短兵接泰斐英阿卽直趨拉枯  
寺之上額爾特又直上昆色爾山巔海蘭察復奪果多  
克山悉據勝勢而拉枯寺賊尙多泰斐英阿額爾特等



自土攻下成德等自下攻上入寺搜羣賊盡殲之常保  
祿又攻菑則大海頽其垣七月阿桂軍克冷角寺以十  
三日抵勒烏圍其地本賊老巢礮堅牆厚西臨大河官  
寨之南木城石礮鱗次櫛比長一里許迤南有轉經樓  
與官寨相犄角可彼此相救其東負山麓又有高礮八  
層層各高丈許礮之上礮益多各路敗回之賊皆助守  
於此阿桂趣諸將於勒烏圍轉經樓之間先破其礮寨  
數十區卽立柵駐兵以斷賊互援路而高礮陡削賊可  
下擊我兵不能躍而上則令軍士縛木於肩背手推土  
囊匍匐至礮下層疊堆起頃刻立三木柵俯擊礮上賊

其礮下賊有掘溝以抗者我軍亦穴地轟礮擊之轉經  
樓之西南有嘉爾日磔橋令楚兵善泅者縛縶於其柱  
曳而圯之是時明亮軍在河西見我軍已駐勒烏圍恐  
西岸賊過河往救亦擊河西各寨以綴之八月十五日  
夜我軍四面合圍礮轟槍擊或拔柵入或騰而上呼聲  
震地擲火彈如流星賊盡潰夜半遂得官寨黎明又克  
轉經樓賊之逸出者嘉爾日磔橋已斷多落水死沙羅  
奔兄弟及各賊日已先期遁乃議進搗噶拉依宜先攻  
西里越科布曲山至瑪爾古當噶則噶拉依卽在其下  
可俯而壓也九月克莫魯古進抵西里有木城一石礮



二與西里寨互援我軍於槍礮如雨之中步步立柵以進是夜擲火彈入木城城外積枯木甚多值大風起延燒木城頃刻盡賊之竄出者悉爲我兵擊殺不出者斃於火十月下至卡布角克之十一月又克舍勒固租魯及雅馬棚賊復於科布曲山結寨死守十二月分四路進擊克之而科布曲之上有索隆古山礮卡更密官兵攻其前索倫兵土兵繞而攻其後又克之十三日至朗阿古其頭人色木里雍中等率五百餘人降遂由瑪爾占當噶進據舍齊雍中兩寺十七日大軍逼噶拉依番衆大小男婦紛紛投出不絕其大頭人布籠普納水達

什阿庫魯等皆降二十日索諾木之母阿倉姑阿青及其姊妹亦來降知索諾木莎羅奔并造謀之頭人丹巴沃雜爾皆在圍中蓋諸賊稔惡已極故天使之羣聚一隅使我得一網盡之無遺漏也而明亮軍自克茹寨後至額爾替又阻明亮以向來軍中運礮有邪許聲賊習聞之不設備六月適新鑄大礮成乘挽運聲喧遣奎林和隆武等分三隊急進賊不覺遂突入其柵克之因并破石真山各寨七月進取扎烏古先遣土兵渡至東崖越扎烏古之後仍渡而西突出擊而官兵在前夾攻遂克之扎烏古之上賊寨甚多官兵少不能分擊八月明



亮過河欲阿桂分兵往助是時勒烏圍巴克方議進取  
噶拉依阿桂以大兵直指噶拉依則其餘枝節自解不  
宐轉分力於枝節乃與明亮約河東兵攻達思里河西  
兵亦攻碾占賊方抽兵護達思里則碾占易克也明亮  
從之而碾占之賊守甚固九月別取道攻斯底葉安十  
月攻納木迪閏十月阿桂遣兵一千來助遂克日斯滿  
而阿爾古賊皆焚寨遁時河東軍漸逼噶拉依河西賊  
皆喪膽故所向輒克遂由甲索獨古水通乃當山掃甲  
雜躡獨松遮巴布朗谷悉迎刃而解乃當之南爲馬爾  
邦過嶺卽富德駐兵處也富德先遣舒亮穴地道以火

藥轟噶咱據之至是赴馬爾邦與明亮合軍以次徇穆  
谷庚特額諸險皆下十二月明亮富德會阿桂於噶拉  
依時大兵合圍立柵周數里無一罅可竄出密如網又  
鑄大礮轟擊連日夜不止礮所著輒洞牆壁數重復斷  
水道以困之索諾木益惶窘使其兄岡達克及朔諾穆  
彭楚克先詣營乞哀索諾木復懼死不敢出四十年正  
月岡達克懇遣人往諭仍稱病匿堅啗中我軍攻益急  
二月四日索諾木計窮乃率莎羅奔甲爾瓦沃雜爾斯  
巴丹及其妻并兩大頭人丹巴沃雜爾阿木魯等挈大  
小頭目及番衆二千餘人出寨捧印跪獻軍門金川平



先是賊勢蹙揚言寨破當舉家自焚死至是竟無一自  
戕者悉就俘大功告成露布八日至京

上恭謁

兩陵禮

泰岱告

闕呈獻俘

廟社

親行郊勞禮飲至策勲封阿桂誠謀英勇公在事大小  
文武官以次封賞進秩

命繪諸戰圖及功臣像於紫光閣恭上

聖母皇太后徽號

頒詔天下

慶典覃施

御製碑文四篇一刻太學一刻美諾一刻勒烏圍一刻  
噶拉依設鎮安營駐官兵鎮金川地復定各土司分年  
入覲例自此各番畏威懷德保塞守邊西南陲永久寧  
謐億萬年長享太平定於此矣

謹按兩金川地較之準夷回部曾不及十之一攻  
五年而後得之勲伐似未足侈述然其地尺寸皆  
山插天摩雲羊腸一線紆折於懸崖峭壁中雖將





軍大臣亦多徒步非如沙漠之地可縱騎馳突也  
其扼隘處必有戰礮發以石而斃於牆垣間以槍  
石外擊旁既無路進兵須從槍石中過故一礮不  
過數十人萬夫皆阻破之之法必步步立柵自護  
以次進逼轟大礮擊礮使賊陝輸不能立足官兵  
卽隨礮入毀而殺之其有礮多徑阻必不能攻克  
者則用繞道別進之法視危巖絕巘無可措足賊  
所不備處乘昏夜捫蘿攀石手足竝行如躡循條  
猿引臂以出其後來攻之故常分路各進或三四  
百人爲一隊一二百人爲一隊賊伺隙於叢箐深

澗亦不過數十人卽突出來搏計自用兵以來我  
兵不下七八萬人從未有列堂堂正正之大陣鬪  
戰場以決勝負者皆鑿以裂罅而後架入又其地  
雨雪多而晴少賊之喇嘛復能用扎荅邪術以致  
雨雪泥深路滑我兵力益難施是以地不及準夷  
回部之大而致力於無可致力之處戰攻之苦不  
啻倍蓰過之昔哥舒翰以四萬人破土蕃石堡城  
之險唐史侈爲奇績然所攻不過一城今則如石  
堡城者不下數十百處節節出死力得之則績之  
奇更前古所未聞也或者謂葛爾小醜不妨度外





置之殊不屑耗國帑兵力於此不毛地抑知彼既  
隸我戎索自難坐視其跳梁而番夷之性但畏威  
不懷德乾隆十四年固常受降肆赦免刀鑊而祗  
席之恩至渥矣正以未經大創轉狃爲故常不十  
年又生事使非有以痛懲之將益無所做懼各土  
司弱者被劫強者亦效尤邊徼且無寧歲屢擾而  
屢討之其勞費更不可數計也我

皇上決策勦滅乘國家全盛之力兵少增兵餉少增餉  
卒草薙禽獮不留遺孽自此西南陲可千百年無  
事此正一勞永逸之長計而豈小見懦識所能仰

窺萬一哉至於運籌握機制勝萬里軍書咨至  
批蒼不逾唇刻諸將稟承動致克捷卽有時闕外  
所籌有 諭旨未到已適相合者亦或有 諭旨  
到已移步換形者而

神謀睿算絡繹至軍諸將知

聖心所注宵旰靡寧皆震動奮勵不敢稍存苟且之意  
軍士亦無一懈心用是謀者殫慮戰者畢力陷堅  
摧險迄奏大勲鋪觀史冊千古以來未有不事墮  
於因循而功起於振作者然則掃穴擒渠固諸將  
士之力而策羣力以集事則惟我



皇上獨握成算堅定不移以成此駿烈也猗歎豈不盛哉  
平定臺灣述畧

臺灣自古不隸中國文獻通考云泉州之東有島曰澎湖澎湖旁有崑舍耶國蓋卽是也明嘉靖中海賊林道乾爲俞大猷所逐遁入臺臺皆土番道乾不樂居其地殺番取其血固舟入占城天啓中有奸民顏思齊引日本倭據之鄭芝龍附焉遂爲巢穴崇禎元年芝龍就撫以其地僦荷蘭紅毛夷我朝順治初大兵下閩芝龍降其子成功不從據金門廈門諸島屢爲患十六年自江南敗歸十八年夏遂襲取臺灣時荷蘭固守不可下

成功告之曰此地本先人故物我欲得之耳金帛悉以歸汝荷蘭乃攜貲去成功名臺灣曰東都設天興萬年二縣康熙元年成功死子錦襲改東都爲東寧縣爲州增安撫司三南北路及澎湖各一其地肥饒穀歲三熟閩粵人爭趨之曰富庶錦據以擾沿海地無寧歲二十一年錦卒子克塽襲僞將劉國軒鎮澎湖二十二年我靖海將軍施琅克澎湖克塽國軒降乃設臺灣府及臺灣鳳山諸羅三縣其地東倚山西傍海北至雞籠城南至下淡水長千餘里東西闊四五十里或十餘里山之東則層巒疊嶂皆生番所居打鹿爲食不隸版籍也六十





年奸民朱一貴倡亂總兵歐陽凱戰死府城及諸羅鳳  
山俱失一貴稱義王僭號永和閩督滿保遣提督施世  
驃總兵藍廷珍以萬七千兵入平之俘一貴獻闕下雍  
正元年以諸羅北境遼闊增設彰化縣及北淡水同知  
六十餘年以來地大物賡俗日益淫侈奸宄因芽孽其  
閒官斯土者又日事賤削會漳泉二府人之僑居者各  
分氣類械鬪至數萬人官吏不能彈治水師提督海澄  
公黃仕簡率兵至以虛聲脅和始解散自是民狙子爲  
亂豎旗結盟公行無忌淡水同知潘凱者方在署忽報  
城外有無名屍當往驗甫出城卽爲人所殺并胥役殲

焉當事者不能得主名則詭以生番報爲番性嗜殺途  
遇而戕之也使人以酒肉誘番出醉而掩殺之奏罪入  
已伏法而殺人者實脫然事外於是民益輕視官吏而  
番亦銜刺骨乾隆五十一年彰化縣有林爽文者恃其  
所居大里杙地險族繁恣爲盜賊囊橐閩廣間故有所  
謂天地會者爲奸徒結黨名目爽文借以糾約羣不逞  
之徒嘯聚將起事太守孫景燧至彰化趣縣令俞峻及  
副將赫昇額遊擊耿世文率兵役往捕不敢入駐營於  
五里外之大墩諭村民擒獻否則村且燬先焚數小村  
恠之被焚者實無辜也爽文遂因民之怨集衆夜攻營



全軍盡沒赫耿俞皆死焉時十一月二十七日也明日賊乘勢陷彰化孫守及都司王宗武同知長庚前同知劉亨基典史馮啓宗悉爲所殺十二月六日又陷諸羅縣令董啓埏死之淡水同知程峻亦爲羣賊所害鳳山縣有莊大田者亦盜魁乘亂起十三日陷縣城縣令湯大奎自刎死惟府城有總兵柴大紀及監司永福同知楊廷理等率兵民固守賊屢攻不能破而彰化之鹿港賊已遣僞官來監稅有泉民林湊等起義擒之是以府城鹿港兩海口俱未失閩中聞變黃仕簡率兵由廈門渡海入府城陸路提督任承恩亦率兵由蚶江渡海入

鹿港副將徐鼎士由閩安渡海入北淡水俱以五十二年正月初旬至賊勢稍斂黃仕簡命大紀北取諸羅總兵郝壯猷南取鳳山大紀連戰復諸羅遂守之壯猷南出二十里爲賊所阻任承恩之至鹿港也距大里杙賊巢僅四十里亦以兵少不敢進壯猷頓兵幾五十日以二月二十一日始進復鳳山鳳山空無人招民復業賊卽潛入其中與外賊相應三月十日城復陷遊擊鄭嵩死焉壯猷等遁歸府城先是二月中  
上見兩提督彼此觀望恐不能速殄賊也有旨令閩督常青爲將軍往督師至是適至府城人心稍固閩督





李侍堯甫莅任卽預約廣督孫士毅調兵四千備緩急而鳳山再陷之信至立卽起兵往遂以三月末悉抵臺賊方攻城急類以不陷李侍堯又奏調浙兵三千上益以駐防兩兵一千令將軍恒瑞爲參贊赴府城提督藍元枚亦爲參贊分浙兵三千赴鹿港有旨以失律誅郝壯猷於是人心咸奮出師有日矣時賊雖猖獗勢力尙未甚大各村民俱未爲所脅也而諸將以五月二十四日出師慮兵少或不敵甫交綏卽退常青又請兵一萬賊得以其暇蠶食各村不從者輒殺於是遍地皆從賊莊犬四驅以擾府城林爽文驅以擾諸羅勢益

熾迨官兵從鄰省調至閩又守風過海凡兩三月則我兵僅增萬而賊已增十餘萬矣諸羅爲南北之中林爽文必欲陷之自六月中攻圍連日夕不止大紀與兵民共守常青先  
總兵魏大斌參將張萬魁遊擊田藍玉副將蔡攀  
林等三度往援皆爲賊所截張魏田蔡僅得入城  
大半貴林及遊擊楊起麟都司杭富等皆被戕於  
羅之圍益密入者不能再出大紀告急之文用小  
寸紙募人閉道夜行始得達府而賊禁粒米不得  
攻益急諸羅士民悉力拒守凡百餘戰幸皆不大  
勦然已饑疲不能支常青催恒瑞自府城



赴援時藍元枚已歿則催總兵普吉保自鹿港赴援各  
有兵五六千俱以賊勢盛不得進孤城將旦夕陷矣  
上念諸羅被圍久特改名嘉義以旌士民而先已預燭  
事幾慮諸將不恃六月中即調陝督福康安為將軍  
及內大臣海蘭察來統兵并發 明詔聲言調兵十餘  
萬來滅賊冬十月所調蜀番及粵西兵共五千先至有  
旨官兵不必至府城當即往鹿港進會颶風不得渡守  
風於崇武澳二十八日忽得順風一晝夜數百艘盡抵  
鹿港海口檣竿如節列數里賊聞之不測多寡謂真有  
十萬兵至始懼十一月八日福將軍等起行賊方列拒

於崙仔頂海蘭察率巴圖魯侍衛發矢殪十餘賊賊即  
披靡海蘭察笑曰此一羣犬耳何畏遂麾兵入沿路復  
擊殺賊之伺隙者至牛稠山再敗之即以是日抵嘉義  
城中官民出迎饑羸無人色見將軍至無不欷歔啜泣  
喜其來而悲其晚也有山名小半天者四面陡絕賊遁  
而聚於此十八日百道仰攻又克之賊自倡亂以來徂  
於官兵之持重不虞此次之難抗也遂遁歸大里杙大  
里杙已築土城頗堅整二十四日官兵至賊猶數萬出  
拒退而復集者數次既夕我兵伏溝坎聞賊萬炬來索  
戰我兵在暗中賊不能見而我兵視賊則歷歷可數發





藝海珠塵  
三  
槍箭無不中賊自知失計遽滅火復擊鼓來攻我兵又  
從鼓聲處擊之殺死無算黎明遂克其城林爽文已攜  
孥走據守集集埔其地前臨大溪溪之上就高岸壘石  
爲陟牆長數里其所預營扼險處也十二月五日官兵  
騰而上殺千餘人於是賊黨皆潰林爽文先匿其孥於  
番社惟與死黨數十人竄窮谷叢箐中十三日先獲其  
孥五十二年正月四日林爽文潛出覓食遂擒之而莊  
大田之在南也雖與林爽文同逆又各自號召不相下  
乘官兵未南下益焚掠聚糧爲旅拒計已又思出降計  
未定而將軍已於十六日至牛莊大田倉猝出拒敗而

走官軍連蹶之於大武隴大目埴南潭中洲大小岡山  
水底寮累戰皆捷極南有地名郎嶠者負山臨海最遼  
阻莊大田力不支與其黨潛匿焉將軍先遣水師由海  
道繞而截之於水自以大兵環山圍之賊衝突不得出  
陣殺者數千溺海者數千擒而戮者亦千餘莊大田亦  
就獲臺灣平

臺灣之變總督欽齋李公赴閩道過常州邀余偕  
行佐其幕事凡一年有餘此編卽幕中所記也事  
皆與方畧合故不復刪改林爽文本漳人其將反  
也當漳泉二府人械鬪之後恐泉人不同亂乃邀



泉人劉志賢共起事欲使爲泉人倡劉志賢自署  
理番同知至鹿港收貨稅有泉民林湊等起義擒  
之鹿港得無恙是時賊方蠶起漳人仗賊之勢嘗  
凌泉人及黃任兩提督率兵至賊稍斂則泉人又  
仗官兵之勢凌漳人迨官兵久頓不進賊勢日熾  
脅各村民從之不從者輒焚劫於是泉人亦皆弭  
首附於漳矣惟鳳山縣南有粵民數十村結寨自  
守賊終不敢犯蓋賊木烏合非真有不可撲滅之  
勢故福將軍等兵至一鼓卽敗之乃知前此諸將  
之過於謹慎未免重視賊也今臺灣旣平有當酌

改舊制者彰化縣城宜移於鹿港而以臺灣道及  
副將駐之康熙中初取臺地時僅臺灣鳳山諸羅  
三縣地鳳在南諸在北臺灣居其中又有鹿耳門  
海口通舟楫故就其地設府治其後北境日擴閩  
人爭往耕於是諸羅之北增彰化縣彰化之北又  
增北淡水同知則府城已偏於南且舊時海口僅  
一鹿耳門由泉州之廈門往海道八九百里今彰  
化之鹿港旣通往來其地轉居南北之中由泉州  
之蚶江往海道僅四百里風順半日可達此鹿港  
所以爲臺地最要門戶較鹿耳門更緩急可恃也



CL.

NO. 35666

幸林爽文等皆山賊但知攻城不知扼海口故我師得揚帆至然海舟大不能附岸須鹿港出小船二十里來渡兵倘賊稍有智計先攻鹿港鹿港無城可守其勢必拔拔則據海口禁小船我海舟雖至亦不得薄而登所恃以入臺者祇鹿耳一門耳兵卽由鹿耳大府城又須自南而北轉多紆折必不能如此次之路捷而功速也彰化城距鹿港二十里不傍山不通水本非設縣之地若移於鹿港鎮以文武大員無事則指麾南北聲息皆便有事則守海口以通內地應接與鹿耳門互爲關鍵使

臺地常有兩路可入則永無阻遏之患時

上方有旨修築臺郡各城余囑李公以此秦李公以築城事別有司之者遂不果然此議終不可廢後之留意海疆者或奏而行之實千百年長計也



二十九年... 先攻鹿洲... 至亦... 又須自南而北... 之留... 樂... 上... 臺...







国立国会図書館 タイトル『藝海珠塵』 請求記号 082.1-G21G

ガラス使用